

漳州府志

卷十五(世三册内)

三五公司所藏

ル 5
3438
15



門 5
號 3438
卷 15

漳州府志卷之二十七

官績四 前半新增 唐分營將以下乾隆志卷三十五

國朝

監司

趙映乘

郁之章

劉三章

蔣允焄

徐宗幹

桂超萬

文秀

黃安綬

趙映乘字涵章河南祥符人順治丙戌進士七年任分巡漳南道時劇寇張恩選等負險自固永定賊蘇榮朱以泰復焚劫苦竹鄉映乘繪劫難圖三十冊上巡撫張學聖慷慨誓師偕遊擊賀國相直搗賊巢榮等就擒恩選

早稻田大學圖書館
藏書
32.4.16

竄死乃購民居闢講議堂延師課士民喜於離禍驟聞

書聲比諸景星慶雲交相慶云

重纂通志

郁之章字衷恆浙江嘉善人順治己丑進士十年任分巡

漳南道駐上杭海寇入漳警報疊至言即日欲屠上杭

居人驚沸欲竄之章密約城守張國棟陳師演武亭手

自草檄以忠義激發有衆咸願效死賊知有備宵遁去

人謂之章寸管勝於萬鎊也

重纂通志

劉三章字逸山直隸景州人順治丙戌進士十六年任分

巡漳南道時靖南王耿繼茂初入關大府檄上杭民夫

千人至浦城聽差三章方抵省廉知民困力言於督撫

得免凡訟讞案多所平反漳南百姓至今誦德

重纂通志

蔣允焄字爲光號金竹貴州貴筑人乾隆丁未進士二十

五年知漳州府二十六年再任汀漳龍巡海道平易近

民因俗爲政軍門馬負書稱其一片婆心每際嚴冬尤

加意夜巡謂是時戶有蓋藏恐奸民生心竊發也兩任

十載百廢具舉遷按察使百姓丐留不可乃勒石道左

以志去思

徐宗幹字伯楨號樹人江蘇通州人嘉慶庚辰進士由州

縣歷牧守感著循績道光二十四年授汀漳龍道至則

先齋宿城隍廟乃即公廨視事之始民多途控宗幹悉

摘傳原被質訊是非立判或舉古孝義事溫語誨導有
 兩造抱持對泣求罷控者訟牒日稀北溪等鄉素號強
 悍漸出掠人財宗幹召其家長者至予酒食勸勵令還
 鄉約束子兪許自新否且盡殺無赦因籍其中壯丁姓
 名為鄉勇隸官由是暴民斂迹行旅得坦涉無患漳俗
 迎神報賽甲土豪率結彩棚晝夜演劇或飾妓鼓吹導引
 藉是箕歛貲財舉國若狂宗幹悉示禁之期存古逐疫
 報功之意而止尤嚴禁戲劇之導淫惡丐之羣索者值
 春旱不雨為文自責默禱於城隍神隨得甘霖三日嘗
 稽祀典志立風神壇宗幹故江南名宿所至以振興人

文為已任乙巳三月甄別丹芝書院手定課程官師月各試詩

文一次為大課考棚屆試又各試經解詩賦雜體一次為小課在家塾作三日投卷凡甄別列內課者給全歲膏火月課列優等者給以花紅旋聞訃丁內艱耆民有在漳守制之請

度不可則私為位於丹霞書院以祀之官至福建巡撫諡清惠同治七年入祀名宦國史有傳

桂超萬字丹盟安徽進士道光二十九年任汀漳龍道以俗嗜械鬪賭博作何苦來歌四首出示勸諭鄭振才為花會首立治之匪草丁差得規包庇之弊草坂社盜藪也銅山洋素泊盜船皆會營殲其渠魁于兵民控案訊斷持平使相輯睦月課書院諸生禮意優至任年餘擢

權按察使同治八年祀名宦祠

文秀字蓮溪滿州正白旗人咸豐二年十二月由浙江甯
紹台道調汀漳龍道慈惠愛民咸德之三年二月兼
攝府篆四月同安轄雙刀會匪倡亂襲陷郡城文秀夜
巡至東橋亭突遇匪擁見渠魁怒罵聲震堂廡匪恚甚
挺刃交集血肉飛濺罵益烈遂遇害於郡廨西偏巨榕
下樹忽斷壓死二賊蓋行刃者越日七保等義民殺賊
復城幕賓李瑛先求得遺軀又二日獲其元肩目瞋豎
鬚髮上植如古廟猙神狀蓋其忠烈之氣激而成形者
如此衆哭拜不能仰視旣成斂遂就斷木雕像髹飾祀

之馬坪庵後楹稱三道祠祠舊祀明蔡潮 國朝陳啟
泰皆任漳南道遭變就義者

黃安綬字蓀園浙江杭州人道光乙巳進士在翰林日久
京察一等授汀漳龍道老成持重儉約自居于士則引
翼教導如不及于民則休養生息如恐傷每月會諸生
課文親操鉛槧經所識拔者先後皆獲雋以郡志近百
年未修方議籌款設局擢按察使旋以督辦上游軍務
沒于延平時杭州寇亂無家可歸眷屬扶櫬來漳遂僑
寓郡城同治三年髮逆陷城夫人張氏聞變投井死次
子訓導愷元婦林氏亦罵賊被戕

知府

魏荔彤

李賡芸

許原清

魏荔彤字念庭直隸柏鄉貢生大學士魏文毅裔介季子康熙四十九年任歲飢令家人買江蘇米萬斛航海達漳民不乏食其設義學行社倉葺江東橋闢府治厯著勞績尤汲汲于郡志之修延聘郡中賢士大夫如蔡文勤世遠諸人參訂成書荔彤手撰序論世推善本在任六載以卓異遷江南常鎮道士民立碑以志去思并塑像祀之於芝山書院講堂

望纂
進志

李賡芸字生甫號鯽齋江蘇嘉定人乾隆庚戌進士嘉慶

十九年任漳州府知府旋擢汀漳龍道越兩載三遷至布政使甫二旬為屬吏朱履中誣訐解任王者持之急賡芸不肯誣服恐鍛鍊遂自裁奏入

上震怒發一星使勘實其事賡芸入著清望又聞人感其德政倡義者合數百人訟其冤星使據以

上聞獄遂白許立遺愛專祠當其為漳守時械鬥最難治蒞政之始悉召鄉約里正至解飭之酒而告之曰朝廷設官正以平爾曲直也奈何不告官而私鬥為皆曰告或一二年獄不竟竟亦是非不可知而且先為身累不得已而鬥耳賡芸曰今有吾在獄至立刻有不當更言

之何如皆曰幸甚賡芸曰然則私門何爲者歸爲我遍告鄉民後更門者吾必擒其渠毋恃賄脫苟有居業吾且盡焚之無悔皆唯唯退然不知其治果何若也已而有門者立調官兵往捕悉如所言門者大懼賡芸日坐大堂上重門洞開吏役更番侍有愬者直入至公案前隨命役與俱召所當治者而限以某時日不至則杖役至則立平之釋去不費一錢民皆懽呼曰李公活我雖外縣皆赴愬則先詢問大槩而後下於縣縣不敢稽以是漳大治至今婦孺猶能道之

許原清字本泉一字少鄂華亭人道光九年以廈防同知

署漳州府事漳屬積案未結甚多原清摘傳原被一二二人訊剖各平其情案皆結謂所屬曰此卽所以清械鬥也漳浦縣門氛尤甚各村築土堡藏銃械輾轉相仇殺原清爲社規四則禁約八條親往曉諭不踰月土堡盡拆濬府治溝港建太武圭嶼二塔脩丹霞書院十年回廈防任未三月復署漳州府事獲巨盜王七娘徐保正法盜賊斂迹明年脩城垣其二塔書院皆落成原清性明敏靜鎮有謀耐煩劇勤於治事大府無不器重之著有閩海學治錄十二卷

龍溪縣知縣

利在三

線應綵

曹家甲

趙印川

附畢定邦

利在三廣東高要貢生康熙九年任時糧額虛懸積弊無可鈎稽在三通計一邑田畝按數勻派又遷界之後各邑寺田浮餉令甲兌徵而前令獨以內治墾田詳報抵額在三為行勾餉法民困大蘇

重纂通志

線應綵正藍旗漢軍監生康熙二十四年任時寇亂初平規制未備應綵捐俸建縣學明倫堂及新倉義倉邑民甫離兵革為休息噢咻之祀懷德祠

重纂通志

曹家甲字為質號安峯江西新建人康熙丁丑進士四十年任對簿不事鈎距各得其情訟庭闐寂邑賦舊有

包納之弊吏役率中飽而官民均受其害家甲催科不用差役復為減耗之半民樂輸無負逋者月課士及童子試必窮定甲乙俗多停柩不葬為溝北廂江東日照岩義塚三所親定向指掩暴骸無算工竣日有海燕數千繞廡翔鳴人以為澤枯之瑞邑東有響水橋久圯為砌以石作亭橋東以憩行者去之日民若失慈父攀轅數十里後以子繩柱任福建布政使

贈如其官

重纂通志

趙印川字珠浦山東博山人道光甲辰舉人以大挑知縣補詔安嘗權輿化屬之莆田明於聽斷性嫉惡膺力尤

絕人一時治盜稱最其任詔安懲豪暴至嚴而寬恤其
弱小一年詔人德之咸豐初郡多械鬥白晝椎埋莫何
大府知印川能檄權龍溪慨然期與俗更始清積案省
係累獄至隨斷周諮鄉俗強弱馴暴時策騎行村聚間
或夜分達旦乃返旣廉諸惡少行事得實械治如律密
啟憲司痛懲強鄉以便宜從事溪邑錢糧積弊詭寄飛
灑多波累無業者印川令民自封投櫃不經吏胥通賦
卽行催本戶而止任年餘闔境帖然婦孺皆頌趙侯德
政械鬥盡息盜或遁迹旁縣逡巡及詔詔且多事于是
飭印川還本任羣不逞者懟甚謀所以撓之約伺其入

境劫之印川故闖達簡騎從盜至惟其子及勇首畢定
邦在三人者直前趣盜刃七人餘衆駭散則大聲遙誅
之曰若輩欲殺吾在今日今日吾何多求若終始怙惡
者吾到官捕汝反掌何狂奔爲時癸丑春正月也四月
同安會匪陷郡城鎮道死之或訛傳賊已襲詔戕趙侯
衆憤擊賊賊錯愕不知所爲立復郡城而印川在詔聞
變方遣定邦率勇倍道馳至遂與兵民協剿餘匪詩浦
以東古縣以南悉平明年再權龍溪時瘡痍初復還定
撫卹一以寬大爲治印川偉軀幹善談論爲文操筆立
就校閱尤敏捷月課縣試卯扇門西已揭榜衆服其去

取之當也累官至延建邵道以署按察使駐兵永安死
髮逆之難至今溪詔二邑述遺愛無異詞定邦年少驍
勇每殺賊摘心肝生啖之後官參將彈壓叛兵遇害亦

山東人

南靖縣知縣

彭璋

何洽遠

崔繹

彭漳江南丹徒舉人雍正元年任西河壩久廢四年大水
潰城垣水退竭力修建長隄以為捍衛重纂通志

何洽遠貴州鎮遠舉人乾隆十八年任十九年溪水暴漲

西河壩又決洽遠更築隄五百三十餘丈視舊加固立

碑誌之重纂通志

崔繹字敷時山西永清舉人乾隆三十三年任嚴於捕盜

夜戶不閉居民侵佔城壕悉清丈還官而深通之重建

明倫堂遷歐山書院於城北增廣書舍來學者三百餘

人重纂通志

平和縣知縣

陸愔宗

陸愔宗字望之江南婁縣舉人乾隆三十四年任寬猛兼

施獷俗漸戢營兵聚博徒恣意為不法遣隸勾攝同伍
竄取之愾宗甲憲捕治並其黨悉置諸法一時營弁為
之股栗重纂通志

詔安縣知縣

楊福五

楊福五字介堂直隸保安州進士咸豐五年任時詔邑霸
田抗租積習相沿業主無利可收徒受納課之累福五
廉知其弊為之逐戶清釐東溪大岸被水冲崩民田皆
荒穢不治福五勸諭各業主佃戶或巨出已力或鳩貲
雇工合築是岸身先畚揭眾皆感激不日成功至今利

賴邑與廣東接壤饒平有大姓械鬥積年聞詔令聽斷
明允越境質成福五勸以數言門立解潮州因捨擄路
梗移會協緝數日後宵行無敢犯者擢任漳州延平等
府疊著政績同治十二年入祀名宦祠

唐分營將

以下乾隆志

李伯瑤

沈世紀

李伯瑤字崑宗衛國公靖之孫也總章二年從陳政出鎮
泉潮間為前鋒分營將比至見賊狡獪難得乃沿江豎
柳木為營伴若不進者以驕兵之計致其來侵生擒藍
雷二賊殺之遂平二十六寨政子元光既請建州治因
奏伯瑤與馬仁等各有所畧請授為司馬等職詔從之

又嘗以兵鑿斷鵝頭山平娘子洞諸寨同時諸將戰功伯瑤為第一有子十三人皆貴卒贈定遠將軍葬北山之麓後遷葬於虎形山其子孫散居龍溪漳浦諸縣至今漳人祀元光者必以伯瑤及馬仁配或為專廟祀之沈世紀一名彪光州固始人總章二年從陳政領軍入閩為分營將運籌決勝動中機宜又身先士卒衝鋒陷陣與馬仁李伯瑤等擒殺蠻寇平三十六寨高宗聞賜名曰勇加隨朝護國右將軍垂拱二年政子元光請建州治授為司馬分鎮南詔世紀年甫弱冠奇謀善策日與元光披荆棘開邨落集散亡課農通商闢地數千里厥

功懋焉卒漳人立廟祀之宋追封武德侯子師聖官侍

御史孫瑄官少卿

今子孫散處龍溪漳浦南靖長泰詔安等處

前志論曰馬仁伯瑤世紀同為開漳名將佐陳氏父子宣力効忠世紀祀於漳記所謂以勞定國者與元光疏薦部曲幹畧首馬仁伯瑤世紀次之岳山之役馬仁從元光並及于難顧其子姓多不可攷傳紀缺焉宋紹興間諸將追封贈號凡九十人姓氏列于封冊伯瑤加號威武輔勝上將軍世紀加號威武輔美上將軍歷元明至於今五百有餘歲矣大抵子孫多賢其宗祖率藉以不沒李氏沈氏代產聞人故斷簡殘

編戰功猶有存者因輯爲傳冠諸將之首以補首志之闕焉

○宋

左翼軍統領

崔亮

崔亮熙州人以武顯郎充左翼軍統領武藝絕倫淳熙間龍巖沈寇猖獗亮以輕騎追躡深入重地力戰死朝廷嘉其忠贈武顯大夫尚書顏師魯奏乞官其子詔從之九年建祠于龍巖西湖之西紹熙二年賜額表忠

○明

指揮使

王謹 侯鑑 陳震 吳憲 覃桓

顧斌

王謹漳州衛指揮使嘉靖三十八年奉檄委任閩安鎮其明年五月調謹兵攻剿濂海灣門諸處倭賊船羣隊飛出衆慮衆寡不敵謹曰奉令攻剿敵強而退非夫也奮勇接戰衝沈大倭船數隻追至梅與海洋射殺倭將穿紅者一人又乘勝追賊於小嶼礁援舟後至謹力戰死之事聞詔以其子襲陞二級撫按憐其忠勇命建祠于本衛旗纛廟之左祀之

侯鑑字子明漳州衛指揮同知福之子生三歲而孤母杜氏年二十八撫鑑成立鑑掌衛事歷官有聲力行孝養溫清定省出告反面之節惟謹常祿所入悉以奉母母性嚴或至鞭撻無怨詞命之跪終日不敢起亦無難色母常病侍湯藥衣不解帶稽顙北辰號泣終夜及母終致哀盡禮既葬有羣鳥繞墳悲鳴三日知府陳洪謨爲孝感記當道立坊以表其閭曰崇孝

陳震字起元年十六襲漳州衛指揮同知部試第一署銅山所會剿海寇林鳳有功擢閩撫中軍調小埕把總大司馬吳文華里居一見器之旋中貝錦奪官歸會吳總督以兩粵珠賊李茂盤據山海間特疏薦震爲北津把總調兵征剿連戰於放雞洋斜陽洋木蘭海浪濠海諸處大破之擒賊千人衝沈賊艘無算殪李茂大獲珠船以歸旣復殲其餘黨寇悉平捷奏擢潤州遊擊賜金幣有差時義以潤州孤懸欲徙其民置內地震力持不可乃依島築城擢潯梧叅將以疾乞解官東征事起閩海戒嚴中丞金學曾延震置幕下震造巨艦百四十餘以備衝突諸所籌海上便宜要害甚具病劇而卒震身長八尺慷慨談兵有封狼胥意而緩帶雅歌居然名將風流所著有轂草蓬萊草刻于家

吳憲字長溪龍溪人嘉靖間以武生從總兵俞大猷剿倭賊有功授副千戶又征海寇曾一本釋被擄軍民八百餘人人感其德有持金帛謝者却弗受歷戰功授漳州衛指揮同知世襲後官浙江都指揮使初憲弟道宗爲海賊許朝光所掠去自贖金五百往續弗許乃乘閒挾宗道遁賊追之急憲先部署親黨伏於道賊大創而去名震遠近官歸置產均諸弟當道以孝友旌其門

覃桓沔陽人襲漳州衛指揮僉事諳武書習弓馬素以忠勇自許正德二年領軍征捕南靖金山大溪諸賊擒賊首楊宗壽等三百名欽賞鈔幣三年把總銅山水寨設

策招撫海寇馬宗實等十一年流賊詹師富等屯結盧溪河頭之大傘山委桓會剿擒獲賊首張顯福藍三等四十餘人又擒長高村賊首羅定亮餘俱奔象湖山拒守南靖縣請益兵調桓出哨會同廣兵夾攻未至猝與賊遇桓獨兵與戰射其渠魁賊佯走桓乘勝追逐賊叢戟刺之中咽喉而死事聞詔贈二級子孫承襲亦加陞二級

顏斌其先懷遠人始祖成洪武間累功陞指揮僉事祖達調漳州衛世襲斌饒胆勇有武畧正統戊辰沙寇鄧茂七之亂賊帥楊福率衆數萬圍漳吏民震懼無敢出敵

漳州府志 卷之二十七 十四
者賊日設雲梯仰攻勢危甚時斌督兵備倭海上夜率
舟師五百人航海來援突圍趨入南城盡散其家貲募
敢死士雜服綵繪虎豹插雞雉爲神兵開東門迎戰斌
躍馬大呼以百騎直壓賊壘麾死士爲兩翼各出利斧
砍之賊大敗去一晝夜復益兵來攻又夾擊破之殺賊
如坵餘黨夜遁城賴以全事聞擢福建都指揮僉事斌
旣以募兵傾其貲故旣卒貧無以葬後十餘年知府姜
諒謀諸郡人相率致賻始克襄事諒因紀其功于石至
今三尺童子盡知有顧侯全城也雲孫臬歷廣東福建
叅將有名士風

叅將

王如龍

王如龍義烏人以勇士有血戰功累陞守備北路時南路
尚梗總兵戚繼光留之破漳浦賊有功摘奸正紀臨陣
輒身先士卒橫嶼小石嶺兩叢倭皆擣其穴而平之陞
福建都指揮

欽依把總

童乾震

張萬紀

許瀚

童乾震嘉靖中任銅山水寨把總與其子養銳千戶白仁
義士陳學書等領兵哨禦屢有斬獲時人爲語曰軍中

漳州府志 卷之二十七
有二童倭賊且一空抵東嶽山與賊交戰殺傷甚衆約
指揮劉玠爲援不至勢孤賊圍之數重身被二鎗與學
書等俱死朝命立祠祀之子孫陞襲二級子養銳爲指

揮使 泉州志乾
震含山人

張萬紀六安人任銅山把總年二十餘以驍健聞每雨雲
陰晦輒駕小舟杖劍以驍勇自隨裝束如漁人因以誘
賊賊相遇手自擊殺之雖屢經險阻而神氣愈旺沿海
數年得安枕無恐萬紀之力爲多

許瀚精悍有勇畧初爲詔安副千戶嘉靖四十年饒寇突
至詔安北門外擄掠男女以去總兵俞大猷督師剿捕
瀚陣斬其僞將詹總兵等有功陞銅山欽依把總四十
四年海賊吳平入梅州厚廣等處焚劫圍攻詔安縣城
燒燬木柵及西關外房屋巡撫汪道昆決策命戚繼光
討之旬日賊縛其梟黨陳進卿獻于帥瀚率諸軍夜從
夾道門進大破之賊遁入南澳瀚從繼光追擊之俘斬
萬五千人賊鋒披靡

把總

蔡以藩 張天威 吳兆爌 袁德

蔡以藩泉州人精悍善騎射所在多戰功巡撫朱一馮器
之崇正間授海澄營把總視師甫三日賊入寇以藩摩

厲以須賊爲引避亡何賊擁衆大至以藩請益兵通判
吳允焯聽哨官何德勝之讒留兵不發乃提孤卒往發
大砲連斃數賊賊益合圍所部兵相繼逃散援絕以藩
力戰死德勝反揚言以藩挾餉投賊哨官蔡春憤甚從
火中負屍出之事乃白澄人相率詣郡請立祠以表忠
魂郡守施邦曜署其牘曰坐以藩香火堂上而塑二逃
帥俞咨臯陳文燦跪于庭事雖不果正自有關風教人
傳以爲美談

張天威莆田人膂力絕倫初爲賊所擄置麾下隨寇石碼
羊門柵叱餘夥去謁巡海道徐日久壯之異以材官遣
攻武平所嚮多捷以功擢澎湖把總崇正二年李魁奇
寇海澄許茂天威奉檄往援斬級二生擒一賊爲禡氣
已援中港更斬二級皆賊魁戰九都衆各負重創天威
獨揮戈電擊聲如雷吼已赴援白沙白沙浦屬也遊擊
鄧世科三矢趣之天威借馬宵馳枵腹歷數十里比曉
與賊遇一揮六卷其戈矢絕無援竟戰死邑令余應桂
爲文哭之科臣仇維正疏其事以聞
吳兆燦同安人嘗從軍西粵間歸巡撫南居益試將林拔
置第二擢海澄營把總李魁奇再掠內地兆燦統所部
戰許茂石碼浮宮斬獲頗多晉守備壬申六月賊寇龍

溪福許兆熾赴援將至馬忽不前鞭之如故乃偕其叔及麾下數人步往賊預設伏遣數輩衣大袖陽為嚮導狀卒誦視告曰此非逋寇人熾曰若乃某遊兵汝膽落耶遂獨前為賊伏兵所殺叔亦遇害其弟奔護尤重創還澄人傷之縣以其事聞中丞鄒維璉遣官致祭

袁德同安人為海澄遊兵把總崇正二年李魁奇入九都勢張甚哨官蔡昆望風奔竄德直前發炮擊之須臾衝鋒許界張明俱戰死德與蔡春各帶重傷裹瘡復戰張天威吳兆熾齊奮擊之賊驚愕退五年劉香寇海澄德與兆熾領兵往禦浮宮賊樓櫓巍若雉堞矢石交下官兵坐小舟仰攻莫能攀援自夜及辰力戰未決驍卒林行先登斬其魁賊交刃之墜舟得不死德奮勇大呼躍上賊艘衆繼之斬獲溺死無算賊自是不敢向海澄百戶

鄧繼忠 周 華

鄧繼忠武進人始祖通以功除鎮海衛百戶旋調漳州衛後所嘉靖三十七年倭寇數百人自潮州突至詔安殺傷縣治及四鄉村男婦無數繼忠督兵剿捕與倭遇于深田隘擒其從陳來成等四人斬真倭首級二顆四十年倭又突劫點燈山白葉洞等處繼忠討之擒其倭

咭咬咭咭等論功陞副千戶世襲

周華含山人祖勝洪武間以功陞永寧衛崇武所百戶調懸鍾所父應晨陣亡華陞襲正千戶嘉靖四十一年海賊吳平引倭賊襲懸鍾所城陷百戶羅倫等被執華力戰死之

國朝

提督

段應舉

段應舉直隸人以戰功授温州守將退海寇有功歷陞福建陸路提督駐泉州康熙十七年鄭經遣劉國軒窺海

澄應舉赴援營於祖山去縣十里相犄角水師提督黃芳泰戰敗於灣腰樹賊益張應舉勢孤顧念城棄不可遂突入共守賊掘塹環之逾三月糧盡賊知其困招之不下遂乘城無能抗者應舉猶引弓下射知不可為乃北向再拜自經於城之西角樓

總兵官

孟全勝 楊 佐 楊 捷 金世榮

孟全勝山東濟南府人亞聖裔也為將以不殺為威所至戒輯兵士不許蹂躪有古名將風順治二年九月

王師入漳貝勒王承 制拜漳州鎮總兵官撫綏安輯民戴

之如父母明年四月卒

採開元寺志

楊佐漳浦總兵順治六年七月佛潭橋寇據新城寨佐勦之力戰死

楊捷字元凱原籍維揚先世仕遼因家焉遂為義州人年

十六即能挽強命中制院洪文襄承疇異之擢為偏裨

國初隨大師入閩以材勇異等授山右撫標中軍遊擊山寇

起率師平之陞宣府大同督標中軍副將蒐軍實嚴斥

堠邊境以寧調江南督標副將援勦兩廣行次銅陵諸

勦金王彭澤偽官兵以功晉九江總兵官恢復江西諸

郡與廣東師會恢復潮州城隨征福建江南又提督山

東皆有禦寇定邊懋勲而於閩漳績尤著順治甲午海

寇為逆捷以左都督充福建右路總兵官至則所當無

勦敵軍抵漳浦寇聞風奔竄當是時漳屬郡邑城垣率

被寇折毀捷駐漳浦庀工興築既完且固民賴以安屹

為海濱保障康熙戊午海寇復煽據厦島為巢時出偏

師蹂躪漳泉間復奉

命督師入閩時姚啟聖開府于漳捕羽書請援捷以為援漳而

不先安泉將有腹背受敵之虞遂長驅先復惠安縣解

泉圍乃疾馳至漳與啟聖議破敵策是冬克江東橋萬

松關已未春寇據險立巢捷絕其糧道俟其困帥師擊

漳州府志 卷之三十一
之賊潰焚其舟擒僞將斬馘無數庚申二月賊分據要害地立十九寨相聯絡以拒我師捷出奇計搗之令首尾牽制難以兼顧乃會師攻復海澄復分三路進剿廈島擊沉賊艦不可勝計數十年逋寇窟穴一旦廓清閩逆平勞瘁不支

溫旨特調提督江南以便調攝秉鈇吳地前後十五年尤多異績授招武將軍捷用兵如神馭下威惠兼濟而於民間疾苦尤加意撫綏故所至將卒用命黎庶又安遠近感慕漳民爲像祠之浦邑建書院曰懷德以永甘棠之愛云曾孫景素巡海汀漳龍道今任山東巡撫

金世榮正黃旗人初爲漳州中路總兵官嚴公有威時兵悍常爲民患世榮嚴約束之由是兵民相安改鎮漳浦復改爲漳州鎮二十六年六月三十夜賊林恩陳媽等謀襲郡城事洩世榮杖殺之漳民以寧後累陞至福建總督

叅將

張國柱 包泰興 陸大勳

張國柱順治六年以叅將駐雲霄海寇圍鎮城悉國柱以三十騎突圍擊賊賊環攻之死戰弗脫赴溪頭漳江死焉

包泰興順治八年任雲霄叅將時鎮城毀移駐莆美堡賊

破堡泰興自縊

陸大勳漳浦營叅將順治五年十一月初九日賊圍城偽

帥盧若騰偽監軍邱建會逼屯西湖大勳出城迎敵血

戰而死

遊擊

柳朝麟 傅宏基

柳朝麟順治九年授海澄城守至漳而邑為寇據留寓郡

城屢陳復海澄之策當事者以寇方求撫不納朝麟曰

是狃我耳未幾千總劉國軒果延寇八時十一年十二

月朔也鷄初鳴聞城中皆海上傳號朝麟拊膺大慟曰

任澄不能復其疆寓漳而與同其禍命也夫遂自刎而

死

傅宏基金華人漳州城守遊擊分防長泰縣康熙十七年

海寇圍縣城宏基嬰城固守援絕城陷被執不屈死之

事聞

詔優恤廕一子

守備

劉超鳳 楊定國 蔣 鈞 蕪華國

劉超鳳字元脩商邱人順治辛丑武進士官詔安營守備

討寇卒乘訓練有方耿精忠叛起鳳不屈自刎死以子

官統貴贈西安副都統祀鄉賢

採河南通志

楊定國山東人漳州守備康熙十四年海寇陷漳逼降不從支解之事聞

詔予贈卹

蔣鈞會稽人隨父任江西中順治丁酉科武舉授騰驤衛

千總陞海澄鎮中營守備會耿鄭二逆之變陣亡

贈都司僉書

賜祭葬廕一子

燕華國雲南人官雲霄營守備乾隆三十三年漳浦奸民

盧茂謀不軌突犯縣城華國接浦令徐觀孫密報即赴

救慮師出衆志搖動詭以會捕竊盜為辭率衆逕進既

登盤陀嶺乃下令曰漳浦警急須直抵邑治救援衆惶

懼失措顧軍律森嚴咸用命夜月微茫疾馳八十里黎

明入城時城中守備單虛諸村落洶洶逃竄聞華國來

援咸周走而呼曰救兵至矣人心始固匪類率警慄奔

伏遂得擒捕正法逾年陞左營遊擊暴患心疾卒于官

論曰武臣列傳舊志弗入名宦附兵紀中以治民治

兵其職各異也要之文武一體捍疆圉而衛人民為

國家宣力効忠事異而功同今於武職歷代官制暨歷官

姓名仍載在兵紀以昭

王章至武臣以功名顯者俱與文臣臚列宦績門內文德

武功炳著史乘縉紳甲冑合而一之祭遵以雅歌擅

風流杜預以武庫稱藝苑進而上之吉甫方叔萬邦

為憲豈異人任歟

漳州府志卷之二十八

人物一 乾隆志卷三十六

班固稱史記為實錄范蔚宗稱前漢書贍而不穢李翱曾鞏譏魏晉已後士大夫事迹暗昧不明皆為傳人物而言由是觀之脩志之難莫此為甚而事信言核使百世後稱為傳人傳文亦莫此為先也舊漳乘人物傳始於唐末至我

朝康熙甲午止刊繁去濫今師其意錄自甲午已後六十年來鄉先生都人士可紀者咸以次登焉歸于謹嚴史法應爾不敢以已意與其間也作人物傳

○唐列傳

陳珣 鄠 謨 詠

陳珣字朝珮元光之子政之孫也少受學於別駕許天正善詞賦元光撫之曰兒非戈戟士乃臺院秀儒也萬歲通天元年舉明經科授翰林承旨直學士珣見武后稱制疏乞歸養縣令席宏聘主鄉校闢書院於松州與士民講習時州治初建俗尚弇鄙珣開引古義於風教多所裨益景雲二年元光討賊戰沒珣哀毀頓絕既葬廬於大峙原墓左朝命以嶺海多故起之喪中代領州任懇辭服闋乃襲封視事開元三年率武勇夜襲巢峒斬

前刃父賊藍奉高首并俘其餘黨遷州治于李灣川即漳浦

縣治二十餘年剪除頑梗訓誨士民澤洽化行表辭封

爵不允天寶元年卒諡文英子鄠按舊志珣本傳有開元十九年登王維榜

進士之語考陳鄠傳唐父老舉陳鄠代及伯梁為刺史疏中云陳珣代事兵民胥慶復舉明經謝官歸休等語不云珣舉進士也萬歲通天距開元十九年中隔三十餘載而珣已老不應舉明經刺史之後復應進士科又考王維傳云唐自嗣聖開漳百二十年登進士自珣始珣物以元和十一年登進士珣以萬歲通天元年舉明經元和在天萬歲後相去百有餘載舊志人物以珣物居第一今更之

豐字有芑珣之子也舉秀才授辰州寧遠令甫之任父老

詣闕奏請鄠有通識練于事情願得為本州刺史時刺史及

伯梁偏將許平國俱貪恣者老朱與家余拱辰等數百人詣闕陳奏云漳本荒徼始得陳政屯戍繼得元光輯綏男珣代事兵民胥慶復舉明經謝官歸休朝廷遂以及伯梁許平國管束斯士盜賊迭起老羸逃竄酷害斯深塗炭已極今有新舉秀才授辰州寧遠合陳鄧乃珣之子通達歷練如蒙使繼父職必能恢擴先業克紹前脩慰邊工朝命可之授朝散大夫中郎將守漳州州士來蕪之望

女歡呼曰州主將軍孫來矣歷任二十九年一州晏安偶疾作兵民籲天願代大歷十四年卒諡忠憲子謨詠許許四門博士

謨字以忠建中二年代父刺州事性剛褊初任不協輿情州民曾拱壁等詣觀察使言之朝議以杓少安任刺史事而以謨為本州別駕少安精地理以龍溪可建州治

奏于朝未得請而少安內名謨奉詔卒成之今龍溪郡治是也復以平粵寇功授中郎將兼漳州刺史凡有區畫民皆驩服元和十四年卒

詠字正雅年二十四受知觀察使薦鎮龍巖輯安士卒刺史鄭昌仕表其器量可比漢仇香乞以為京兆別駕詔召之至京力請外補授汝寧錄事轉恩州叅軍奉表至京京兆尹黎幹請於朝曰陳詠酬酢如鐘舍音大小隨叩如水待波方員隨器不衍人人自莫之捨乞留府攝治中上從之居七月遇朝廷籍宰相元載家產株連士大夫詠幾不免既而事獲明奉命招撫蜀中權攝京兆

事皆辨治十四年丁父憂服除補光州司馬勤其職以疾乞致仕

論曰陳珣將家子揭德振華能以儒術顯功名於景雲開元間觀其父識之于總角曰兒非戈戟士蓋喜之也清漳自宋迄今多鉅人長德以鴻文粹學衣被天下先河後海必以珣稱首焉傳子及孫咸世其家繫乃祖乃父忠孝克篤貽謀之臧且又有媯之後也盛德百世祀不其然乎

周匡物

匡業

潘存實

謝脩

周匡物字幾本龍溪人元和十一年進士及第初匡物未

第有時譽嘗與軒轅古鏡歌云欲向高臺對曉開不知誰是孤光主王播見而異之曰會當與子作孤光主耳後果為播所舉士唐自嗣聖開漳百三十餘年登進士自匡物始御試學殖賦鶯出谷詩為世傳誦讀書天城山上嘉賞其人勅改其山為名第山因號名第先生仕至高州刺史兄匡業貞元八年明經登第為鄱陽縣令與匡物齊名子漢傑授當州司戶叅軍後為漳浦縣令潘存實字鎮之漳浦甘棠人與周匡物讀書于天城山時稱周潘二先生初應舉以晨光麗仙掌賦賦見藝文志及雙陸子賦得名元和十三年庚承宣侍郎試禮耕藉田賦

玉聲如樂詩登第存實有大志嘗覽郭璞閩地記南臺江沙合則出公輔遇人自閩郡來者輒詢江可揭衣否歷官南省郎中東官左庶子累遷終戶部侍郎

謝脩字升之龍溪人澄今海清心藻思迥拔流俗當廣明西

幸恥於事逆晦跡窮巖中與其弟脩築宇著書自適也

至光啓迥鑿乃出登第後人名所居之園為文圃山按

季分崩主簿洪文用不為時屈亦隱于文圃山有詩古文集又有石贊者字華甫宋熙寧間人以世胄遊京師出歸論忤權貴浩然而歸亦隱文圃山其所著詩文皆以文圃名集鄉人楊志作三賢堂以祀之西蜀何致一

論曰周氏潘氏俱以詞賦登上第雄文麗藻與山川

相映發謝氏兄弟閉戶著書進退以義雖所操不同

然風高采烈使瀕洞海濱相勸為懷文抱質之彥其

功一也

王勇 王義童 王彥昌 赫連韜 陳黯 王肱 蕭樞

林顥 陳蕪 陳發 詹雄

王勇王義童舊皆瑯琊人徙居龍溪勇改為東衛州刺史

義童為泉州都督淳祐志督字下有缺文王義童又見

武德末年任按閩中唐稱泉州亦稱長樂郡刺史福州都督

時龍溪尚屬武榮州王勇事未詳宋吳與漳州圖經序

王彥昌其先瑯琊人自東晉肅侯彬王導從弟封遷于閩

世居龍溪後分其地置漳浦遂為漳人彥昌唐末官至檢校司空當寇亂時能扞禦跋扈為鄉邦依課子孫謹樸自守邦人稱之

出鄭俠王氏墓誌

赫連韜漳浦人會昌咸通間士多困躓而韜與莆田陳黯並為布衣祭酒有聲黃御史滔稱其以不羈之材出人之行懇懇乎進趨恂恂乎鄉黨而自坎于命時莆田有王肱蕭樞林顥福州有陳蕘陳發詹雄與黯韜同時名價相上下時稱八賢云

出黃韜序

前志論曰瑯琊健舉赫連傑秀王勇王義童王肱輩僅標舉大概代遠年湮紀載殘闕不敢附會疑以傳疑之義也惜哉

○宋列傳

顏慥 唐臣 敏德 歿 復之

顏慥龍溪人 今海澄 初與蔡襄為金石交讀書西湖白蓮院

以文章德行相高慶歷間襄為郡幕辟本州教授與襄唱和頗多及襄遷京職慥遂卜隱於青礁時海濱文教未興慥倡明道學教授生徒人皆化之卒祀名宦曾孫

晞哲唐臣

晞哲大學內舍登紹興二年進士歷同安丞時方行經界法晞哲被檄往古田縣按畝覈實官吏服其公平改秩

知福清縣有聲監司郡守列薦於朝

唐臣紹興戊辰進士所居巨族里有綠石渡今海澄地潮平時

可舟潮退則泥濘涉者苦焉唐臣乃於北涯壘土填淤

築石為堤寬坦如砥長二千七百八十尺作垂虹亭以

憇涉者子敏若復築南堤至新亭凡一千九百尺歲久

石沉淤中孫戴復填土砌石增而高之行者為之謹云

渡不艱待三顏子敏德孫幾

敏德字克和乾道五年進士知循州除邕筦安撫官至朝

奉大夫邕數有峒寇敏德馭以威信卒不敢犯界

幾以父澤補官字子治歷仕多在海外亦以撫綏黎蠻有

功就改京秩海外諸洞剽掠昌化軍幾討捕之悉平詔

改昌化為南甯因命守之就除瓊管安撫奏變差役為

僱役士民懷之立祠焉顏世居青礁原屬龍溪今為海澄人幾從子復之

復之字子開祖曰敏則父曰質淳祐元年進士有能賦聲

試禮部尋補太學已而遷太學錄調惠陽教授為人貌

溫氣和不苟訾笑輕財好義表裏如一與三尺童語必

見肺腑葉侍郎薦十賢于朝復之其一也

論曰顏氏之興實始自廣文慥三傳而唐臣作隄利

濟生人其後彌大古田平經界邕州弭寇昌化惠民

皆循愿吏也復之即未大用而好義信友嗣乃祖風

德厚者流光信夫

黃彥臣 願 碩 預 穎 杞 朴 樵 仲 樵

渙

黃彥臣字叔燦龍溪人弱冠登治平四年進士初授南寧簿宿州錄歷知長汀南安二縣倅泉廣二州守莆汀劍建四郡官至朝散大夫累贈少師彥臣倅郡時太守鞫大盜誣服欲亟寘之法彥臣疑其寃請緩之果獲真盜鹽禁嚴私販滿百斤論死汀有被捕者斤滿百彥臣令且置鹽郡庭中不問久之鹽化為鹵斤隨減得不死劍建舊苦丁錢至有子不舉者後丁錢已奏免以口食艱

仍不舉彥臣令保正報官給錢贍之後為式彥臣教子其篤諸子皆奮為聞人長子願尉晉江時製一肩輿寄奉彥臣彥臣惡其侈焚之且貽書責之云歸日當予夏楚願覽書若無所容其清嚴類此有文集二十卷雜文數卷行世子七人曰願曰碩曰預曰判曰穎曰顯曰顛顛顯累薦免省解願以父任人官碩預判穎連登進士從孫渙曾孫曰杞曰朴曰樵仲曰樵各有傳
願字修可彥臣長子宣和中以父任補齋郎調晉江尉知上杭清池二縣歷官大府司農寺少卿靖康初知楚州時京東寇攘民數恐有劉士忠者播散訛言願便宜誅

之眾賴以安乃請罪於朝璽書嘉之既車駕巡幸楚州
觀城壁完固軍民安堵除直徽猷閣及駐蹕維揚加龍
圖閣徙知揚州安撫淮南東路朝論以願熟于邦計將
除戶部侍郎有阻之者乃加右文殿修撰建炎二年金
騎薄城下時相黃潛善猝命願赴京口因坐失守削秩
上知之深未踰年盡復原官遂乞休官至大中大夫爵
龍溪縣開國男優游里第十五事繼母以孝聞

碩字若冲彥臣第二子大觀三年以上舍生與弟預同登
進士初調建昌教授外臺交薦自江寧刑曹累官至朝
散大夫年五十恬於仕進奉祠里居教授生徒著周禮
講義及卒郡守李彌遜祭以文曰隱居好學遠近慕之
其陽亢宗之流乎不慕官榮憂游卒歲其馬少游之儔
乎時以爲知言

預字幾先彥臣第三子大觀三年進士著有書經解初調
汝州教授未上學官列薦除大學正時舍法盛行預篤
于訓導特轉兩官出知桐廬縣有惠政築亭曰虛舟自
爲記入拜監察御史以直言忤蔡京貶邠州宜祿縣令
起爲廣東倉未行仍貶宜祿卒

穎字秀實彥臣第五子年二十四以上舍免省解赴廷試
值彗星見穎指陳時政無少諱及榜出凡言彗不爲災

者皆寅前列穎附第四甲抑殿丙科調秀州崇德簿改
 應天府戶曹未幾改吉水教官累遷至著作佐郎時兄
 願為卿預入臺而穎任樞密院編脩兼符寶郎三人同
 列清要官侍奉魯國太夫人崔氏于邸衆榮之俄遷中
 書舍人方拜命有忌其才者出為提點江州太平觀穎
 温恭廉介尤工書隸嘗書題名碑人爭摹焉有周禮解
 義春秋左氏事類行于世

杞字景華以門蔭補登仕郎任寧化尉以捕盜功改秩知
 浦城縣再調温之平陽有控盜鼎者盜自訴兩手俱折
 杞佯罵控者以鼎予之頂而去遂坐盜罪衆服其神通
 判太平州官有圩田以堤打水而耕于其中每歲修築
 役民民苦之杞召豪戶築堤免其差徭民得無擾畱守
 胡元質器之每論薦必首杞擢知肇慶府陞辭奏對稱
 上旨目送之丞相周必大叅政畱正交薦於上將內除
 杞力求便郡除知潮州杞歷官清介子惠尋奉祠歸朱
 文公守郡時相契重杞九月十九日生文公贈詩須信
 九秋饒好景還遲十日作重陽
 官至朝請大夫

朴字文卿亦以門蔭補廣西懷集尉攝邑事年少人易之
 一日寇犯連賀二州乘銳至懷集官吏失色朴自率鄉
 兵禦之賊引去帥及漕司同日並薦又調陽江尉攝邑

事邑多巨族好持吏長短或以事干朴朴指數其罪過
寘之法一邑肅然胡尚書銓自海上召還取道陽江聞
朴名曰當列爲薦首未幾海寇劉承興侵掠高雷化三
郡且欲吞噬南恩州朴糾合商船十餘艘載健卒出迎
敵賊聞之宵遁改秩宰安溪崇學校課農棄京兆尹陳
輝出帥五羊辟朴幕官秩滿倅邵武又倅福州兼西外
宗丞時帥相梁克家召還京朴攝州及宗室事二司公
給一無所取力丐祠歸克家薦諸上朝命未下而朴逝
當留丞相爲布衣時在惠陽朴一見奇之曰公輔器也
及尉廣西與受代不十年爲禮部尚書其先鑑如此

樵仲字道夫淳熙五年與翁杰同登進士第樵亦以是年
入太學樵仲初調永福尉再調汀州錄俱有善政官俸
外一無所受自書于屏云俸薄儉亦足官卑清自尊謝
事歸晨興率子弟衣冠拜家廟退而默坐終日飲食衣
服不求鮮美曰無過吾分居喪三年無笑容鄉里有爲
非者唯恐樵仲知之也朱文公守漳牒請入學稱其氣
質渾厚操履端方杜門讀書不交權利若屈居教導必
能使諸生感化興起後奉檄校文漕闈甫竣事疾作卒
之日神色自若文公遣倅經紀其後事有禮記小學口
義傳于世

樵字實夫未冠作南浦歌傳誦人口淳熙中入太學旋丁
丙艱歸服除復入大學中舍選以平等釋褐尋遷舉錄
獻十論於宰相王淮丁未登進士丙科唱第之日朝士
爭識其面樵家居及在太學受業者常數百人初調南
劍學官篤意教導日以龜山了翁諸前修勵諸生嘉泰
壬戌辟考士南宮尚書木公謂人曰經義非黃架閣所
取不收時三經魁皆出樵門衆賀得人金壇王遂名士
也卷已黜樵得之喜曰此必博洽奇特之英得不黜遂
及門謝曰遂終身不敢負先生官止宜教郎有詩經解
行世中庸語孟解及文集十餘卷未及刊士紳多藏之

渙彥臣從孫也父頤以文行推於鄉渙初任歸善簿以廉
謹稱嘗攝尉獲盜當改秩讓之同僚遷循州推官再爲
廣東幕職帥龔茂良以堪入清要薦之范成大開府江
廣檄攝潯州再攝撫州皆有聲

前志論曰世傳彥臣寬死獄有陰德之報然觀其所
以課子清慎敦厚去泰去侈故後人服官任職雖不
盡同大都以醇謹著亦其家訓使然也清漳自有宋
以來稱名家高閎競推崇黃氏豈虛也哉

許光亨

登

伯鸞

伯鳳

許光亨字必達遠祖天正隨唐將軍陳元光開置漳郡遂

家焉逮光亨十四代矣分徙徐翔今海澄之七都也登
大觀三年進士調江寧令興學勸農及提點湖南刑獄
讞論平允改開封治中重和元年因論災變極言當清
君德去宵小通言路人事得則天和可致出判相州御
史陳瓘言不宜疏光亨杜言者口乃名爲太子中允宣
和三年兼祭酒遂乞骸骨不許累擢門下侍郎力辭詔
許奉祠歸架月樓於兩亭山下飲酒賦詩卒年八十孫
登

登字希進紹興戊辰進士調長汀尉轉合城峒黎時出
剽掠當道議盡殲之登曰黎亦吾民也單騎往諭皆誓

伏累知興國州教民力作復置鄉塾課其秀者當報績
乞歸孫伯鸞伯鳳

伯鸞字廷徵淳熙丁未進士知江州歲饑發倉僚佐請待
報可伯鸞曰甯謹于君無負吾民由是活數千人伯鳳
少慧善屬文紹定己丑特奏名爲長安尉嚴禁令轉丞
青城調銅陵民畏之過於令數轉御史臺主簿以母老
乞養疏云陛下大德所當効力鷹鷂堂上高年不能忘
情烏鳥遂歸兄弟奉母終其身不復出

論曰太岳之裔見於史書者許氏尤昌熾宋王安石
譜之詳矣光亨之初相天正寶從玉鈐肇啓斯土其

惠澤與清漳同行雖勃焉而興固遠有端緒也若火
攸灼誰能熄之孫會蔚起遺愛在民誦伯鳳陳情之
句孝弟之心油然而生真不愧令德後哉

顏師魯 著仲 頤仲 孫昭先 叔謹

顏師魯字幾聖龍溪人紹興十二年進士調番禺興化簿
懷安丞改秩知寧德縣歷知莆田福清縣興水利平市
糴常平使鄭伯熊以治行薦于朝除糧科院改添差威
武軍簽判帥陳俊卿尤器重之薦可大用召爲官告院
遷國子丞淳熙四年除江東提舉時天雨土日青無光
舉朝諱言災異師魯陛辭極論之謂田里未安犴獄未

清政令未當忠邪未辨天不示變人主何由省悟上矚
其言尋除浙西常平使歲鹽百鉅萬本錢多不給竈戶
苦之師魯出帑緡盡償宿負令竈戶不得私鬻比旁路
課獨最尋除直秘閣七年召赴行在上疏論浙西圩田
圍築之弊語侵權倖復奏民有墾田未受租者但當正
其租不宜以盜種罪之失重農本意奏可著爲令除監
察御史奏乞增臺官以廣言路有葛揆者自外府得內
殿宣引將補御史師魯亟奏謂朝廷雖乏材寧少此輩
臣雖不肖羞與爲伍詔與揆外祠在言路三年每奏悉
當上心上曰卿可謂知無不言未幾請外補諭曰臺中

方且以為得人除太府少卿黃中丞洽舉師魯自代

舉詞

云德性之厚每事皆誠採履之方一毫不擾十年兼右司刑曹郎官適太學

司成闕上諭宰執擇老成人僉以師魯對除祭酒規約

率以身先教諸生治已立誠所取多名士

余復黃樵顏域後皆為聞

人上曰顏師魯到學未久規矩甚肅除權禮部侍郎兼

祭酒前後三入成均學政脩舉尋兼吏部侍郎有旨改

官班特免引見師魯奏曰祖宗法度不可輕弛因言賜

賚太濫應奉微勞皆得黃金雖內帑封樁不與司農經

費然無功而與是棄之也十三年冬金人遣使賀正且

差充接送伴使所過州縣供饋皆卻之十四年夏上疏

請外上曰侍從如卿未可言去會太上升遐洪邁請廢

號世祖師魯率禮官鄭僑太常少卿尤袤入奏詞甚剴

切大約謂太上中興與光武同繼徽廟正統與光武異

子雖齊聖不先父食恐在天之靈有所不安邁論遂屈

其後廟號謚議皆如所請天下是之差充遺留禮信定

初顯仁遺留使至金逼令簪花聽樂師魯陛辭言今國

勢固非昔比較必不敢強以非禮萬一如此臣當守死

以辭上為之惻然至北界沿途設宴力請徹樂至燕山

堅辭簪花執射據經陳義反覆慷慨金人終不能奪次

日傳玉器刀劍令齋還師魯抗辨若遺留禮物不蒙全

納上國所賜亦不敢受往復數次成禮而歸復命壽皇
宣諭不易不易久之復宣諭曰禮可謂盡矣除試尙書
吏部侍郎師魯久在銓曹守法惟謹曩時部胥爲姦士
夫有請卒無可否故爲出入辭以要之師魯一裁以法
故事侍從滿歲爲真師魯自登從列逾二年矣或云侍
郎在儀曹許時今欲爲真如何師魯云除命出朝廷某
何敢預壽皇素知師魯忠誠奏事畢除命下旬日間兼
吏部尙書師魯屢乞引年謝事上優獎之降詔不允除
吏部尙書兼侍讀上方倦勤將遜于位遴選儒臣以遺
嗣聖師魯感激知遇且謂生平讀書今得預講席當不

負所學光宗卽位師魯首陳正始之說上嘉納之忽一
日上疏乞歸田里有三宜去之說上謂宰職曰師魯求
去甚力可優進職名與便郡除龍圖閣直學士知泉州
廷臣引唐韓愈留孔戣事相繼拜疏乞留朝辭奏乞親
賢積學以崇聖德抑情制欲以養聖躬上宣諭曰銓曹
得卿朕甚惜卿之去翌日令侍從官餞之及行諸從官
云今日之會蓋得旨餞送可謂榮矣相與賦詩泉大郡
舶貨所通官吏摻稅苛求無虛日師魯至首戢之行平
易之政以誠率下或遇水旱齋禱不三日必應永春上
供銀例預借於民安溪縣職官田及逃亡產稅皆責民

補納師魯停免之會請行經界法監司下諸州議師魯因條二利三害上之遂止泉人塑像立祠至家家繪像事之惟恐其去紹熙二年冬有旨進煥章閣學士令再任師魯感激恩命復視事留意學校葺洛陽橋乞閑之章累三四上上勉從其請進寶文閣學士提舉隆興府玉隆萬壽宮去之日民如失慈母作去思歌聞于朝復起知泉州師魯上章避免詔未下疾作卒于家年七十有五師魯自幼莊重若成人孝友天性嘗曰窮通自有定分枉道希世徒喪所守故其大節確如金石雖動與俗情不合而終皆翕然信服官至大中大夫爵漳浦郡侯食邑一千戶贈宣奉大夫泰定二年詔特賜諡曰定肅子徹衡孫者仲頤仲熈仲等俱以蔭補官者仲頤仲有傳

者仲字景英以祖澤補承務郎調福州海口鎮鎮有書院者仲置莊田製祭服諸生德之遷知鄞縣寧宗升遐差通判紹興臨安二府理宗寶慶二年擢進士第初遷進奏院除知江陰軍修學廩士取朱子所纂小學書鋟木以教諸生會歲饑請午朝得米三千石全活甚衆召除大府寺簿遷屯田員外郎吏部郎中壬辰策士充編排官除右司郎中直秘閣出爲淮東提舉兼提刑陞辭論

君子小人所以異謂公論所與者爲君子所不與者爲小人上然之曰卿知守家法不事詭隨因扁所居曰知守堂遵聖語也除直寶謨閣樞密院副都承旨未幾又除司農少卿兼中書門下省檢正諸房公事上眷方隆者仲浩乎有歸志遂除知池州改江西運判兼權隆興府名除大府少卿力丐祠提舉武夷山冲祐觀者仲雅愛士類所至以崇學校獎風誼爲先買田收其歲入以贖計偕之士士譽歸之官至中奉大夫爵龍溪縣開國男

頤仲字景正者仲之弟理宗朝以祖遺澤補官歷寧化尉

轉西安丞除知西安縣皆有美政丁內艱服闋調衡山未任委轉運司幹辦公事遷通判臨安府端平元年除將作監主簿出知嚴州時錢楮中半之令初行吏民震恐頤仲爭之上官曰郡入納純用楮而責以見鏹是強其所無也又曰忤旨獲戾罪止一身便私自營害延千里朝廷不能奪令用全楮解發明年入爲司農丞攝金部郎官除直秘閣兩浙轉運判官時禁旅饑出諄語輦轂之下人情洶洶頤仲親詣諸營撫定之除戶部郎知臨安府浙西安撫卒猶諄語頤仲曰昨撫諭從權耳今事定宜討有罪以尊國體密諭主帥物色鼓倡之尤者

誅之詔云爾將漕闕下聲采奮厲撫虎兕之出柙知牛
羊之求牧拊循彈壓都人安之左曹輪對言邇者火土
交陵金月相守流星夜隕太白晝見訊諸占書其言可
畏而君臣上下乃晏如平時願嚴恭寅畏以弭天變又
曰紀綱者國之命脉二十年來紀綱蕩然宜絕宮中內
降以杜傍蹊私請進將作監仍兼府事輪對言今日兵
驕楮賤皆由寬而不嚴致玩之漸散而不斂積輕之源
又言物少則貴多則賤爾者楮幣印造數多知散而不
知斂約浮就實全在節用及中外獎事甚悉每奏上輒
稱善明年進大府少卿京尹如故嘉熙改元除廣西轉

運判官首奏乞罷海外瓊崖儋萬四州鹽本錢云四州鹽賤如

泥民不請于有司而有本錢之輸民不苦于淡食而有
敷買之擾戶耗賊繁職此之由百年弊法徒以錢係上
供莫敢更變乞永住罷帥又乞罷二十五州身丁錢云
司願樽節為四州補解又乞罷二十五州身丁錢云
錢始于五季每丁十文既而加倍至于十倍百倍米亦
如之遠民以有身有子為累竄于蠻徭逸為盜賊實官
吏驅乞并蠲免二事皆報可三年令赴行在奏事言今

日旱被數路潮喘堤岸民死于敵死于盜死于饑而赤
子不聊生今年陷襄明年失蜀又明年破淮而長江為
邊國勢岌岌如此乞下哀痛之詔風厲有位革舊圖新
以回天意除大府卿兼勅令所刪脩官遷司農卿兼左
司四年兼權戶部侍郎以直寶謨閣知寧國府其救荒

行楮寬征恤民一如嚴陵之政淳祐改元除浙東提刑奉崇禧祠二年起知泉州以秘閣修撰兼福建提刑有德于民去郡日攀臥塞途四年起知温州明年遷右文殿知慶元府沿海制置使奉蠲細民沙岸罷桃花定海官渡錢濬六十里渠及慈溪定海港堰學宮齋祠脩飾一新六年詔頤仲職事修舉陞集英殿七年除寶章閣待制因歲饑遣百餘艘往廣州收糴郡倉抵價折納甲戶按籍勸分查境內四十餘萬口排日賑糴仍奏乞當平二萬餘石半濟半糴詔俞其請全活甚衆八年除兵部侍郎疏乞祠十二年以刑部侍郎召內引奏事言臣

歷閩浙被水之郡建劄衢嚴願更加賑卹除權兵部尙書俄擢刑部兼知臨安府都人素習條教坐以無事明年冬擢吏部尙書以寶章閣學士提舉玉隆萬壽宮抗章請老名其圃曰畝忠卒年七十有五官終吏部尙書與定肅公同人異之

孫昭先字延父龍溪人家世業儒父昌博學清修爲鄉校矜式以昭先貴贈中奉大夫昭光少穎悟中奉曰兒必大吾門登淳熙二年進士調興化簿迎侍中奉書忠孝勤儉四字于屏示之昭先佩服以周旋民有冤率詣郡自列願於簿求正丁外艱服闋除坑冶司改秩知安溪

海州府志 卷之二十一
縣爲政簡易催科不擾凡有差役必按籍第其先後多方寬卹之修學舍撥廢寺之田以贍士民尋通判婺州授分司糧料院嘉泰初詔宰執薦士丞相謝深甫知院何澹首以昭先應差辦行在諸司輪對論謹名器嚴法度等事上嘉納之除司農寺簿時大農告匱朝旨委都戶部同寺官究積弊之源昭先條具甚悉一一見之施行明年都城火詔百官條時政闕失復上疏言五事失于下則五行汨于上今日民生之困官曹之冗將帥之自豐官曹之失職願陛下與二三大臣培植根本愛惜名器嚴軍國之賞罰課諸道之殿最則綱舉目張利興

害除上以當天心下以尉民望而災變不足弭也遷寺丞出知衢州至郡延士民訪求利害不旋踵行之繕學宮築城垣津梁驛舍無廢不興適天旱精意以禱甘雨隨注郡人爭肩其輿以行歲歉檢放秋苗至萬餘斛發廩勸分隨地賑糶全活不可勝計臺閩合舉治行爲一道寇召對言外攘之策莫急內治內治之要當先安民苟徒知軍需期會而民生疾苦不加卹則外攘未效先取內憂上首肯者數四除吏部郎輪對言時事方棘沿邊官吏番土並不以時欲將極邊次邊賞格特優候事定仍舊有從之除浙東提刑台郡有誣平民爲盜以

江州府志 卷之二十一
三
希賞者覈實縱釋之皆感泣去劾貪殘昏繆吏幾二十
餘行部騎從省戒官吏無得供餉條陳鑑湖旁田雖
聽民請買須立石以定界至使不得侵佔旨下提行司
行之嘉定中召赴行在除吏部郎入對言朝綱未清邦
用未節士氣未振民病未蕪四事又論監司守臣到任
半載俱各條其民間利害以聞除樞密院檢詳諸文字
歲旱詔百僚上封事昭先條陳四病其略曰沿邊流離
病於無以自贍內地楮券病於不能通行諸道刑獄病
於奏報之稽遲改送之紛擾州縣賦稅病於催科之峻
急征權之煩密俄除右司郎中輪對論保伍之法務在
便民不宜煩碎宰執宜清中書之務除大府少卿抗辭
弗獲除直寶謨閣提點江東刑獄改主管成都府玉隆
觀累疏乞謝事特轉朝議大夫致仕踰八袞而終子叔
謹

叔謹字信之幼聰敏旣長刻志問學初以郊恩補官調揭
陽尉嘗攝邑符邑有稅務去州務不遠民苦重征叔謹
力言於郡弛其一以便民會守黃自求至卽奏罷之踰
年除大理評事持法守正廷中稱平輪對言旱蝗爲虐
所在荒歉郡盜侵擾邊境搶攘乞責長吏以賑卹實政
課守帥以備禦實功嘉定十年登進士除知莆田縣迎

父侍養官事悉以諮白父聽其剖決明允輒喜形于色秩滿授泉州通判丁艱服除遷大理寺丞理宗卽位陞對言天下大器得之難守之尤難乞脩明君德振舉治綱謹好惡於出合審輕重於用權又言長民之吏推剝之弊多總戎之官培克之風熾請遴選監司大守俾率部屬究心牧養精擇制閫主將俾飭偏裨一意禦侮上嘉納之大理正卿缺叔謹署焉朝旨劄下聽奏獄囚府尹遣吏至寺門已二鼓必欲啓鑰以入叔謹命守者諭之曰夜深非出囚之時少俟翌日吏不懌頗出異論後聞于朝卒是其說越二年遷大理正陞對進正心持久

之說又言諸郡奏讞之獄輕罪必先論決刑寺取會之案具報必須如期庶無淹延稽遲之患上可其奏時廟論欲以刑郎委叔謹攝力丐外出知潮州潮漳接境利病熟知者卽日罷行之五鼓坐廳事訟牒數百剖決如流州兵惰弱申嚴教閱尤勤于課士常俸外悉捐爲脩學費更創四齋增置學田新思韓堂訪求昌黎遺文刊置堂壁嘗以羨錢三萬餘緡爲三邑代輸下戶鹽役邦人感德立像於韓山去之日擁送至數舍不忍歸其子以祖蔭當補官叔謹乃遜於從子士夫賢之

前志論曰顏定肅侃侃閭閻有守有爲卓乎大臣之

選者仲長厚頤仲英果第昆競爽均卿才也孫氏父子敷奏詳悉處事敏斷非惟知之又實行之信矣

高登

高登字彥先漳浦人少孤力學日誦數千言刻志勵行宣

和間為太學生金人犯京師上皇出避登與陳東等上

書乞斬六賊臣

蔡京童貫王黼梁師成李邦彥朱勔

以謝天下廷臣復建

和議奪李綱種師道兵柄登與陳東再詣闕上書軍民

不期而會者數萬時帥王時雍縱兵欲盡殲之登與十

人屹立不動乃止欽宗即位擢吳敏張邦昌為相敏又

曰李邦彥無辜復召用登上書言陛下以東宮踐祚人

人翹足以觀新政奈何相吳敏張邦昌再納李邦彥大

失民望不報明日又上書言陛下有太甲之不明而朝

無阿衡靡明皇之有初而遽相林甫乞罷敏邦昌逐王

時雍等名徐處仁為相臣以布衣微賤之言係宗社之

存亡未可忽也書五上俱不報因謀南歸聞有旨張邦

昌李邦彥各與遠郡趙野李悅王孝廸相繼罷斥徐處

仁正台司馮澥職諫垣與所言偶合者十七八登喜曰

是可以盡言矣復上書言吳敏庸邪尚居宰輔時雍姦

佞尚尹開封黃琮方正倅於小郡次山剛介錄事學官

秀實學行優純得一博士而猶罷去次日又言諫官所

論陛下批荅云朕所素定又云朕所不好是護所短而不使人言之言路塞則下情壅危亡可立待矣書入皆不報初金人至六館諸生將遁去登曰君在可乎與林邁等請隨駕隸聶山帳中帝不果出金師退吳敏遂諷學官起羅織登等屏還鄉紹興二年上駐畢臨安登以十事投時相不行遂于廷對盡言之考官忌其直例作文理紕繆與陳之茂等十九人授下州文學尋有旨附第五甲授富川主簿憲使董父聞其名檄讞六郡獄賀第五甲授富川主簿憲使董父聞其名檄讞六郡獄賀仍兼賀州學事學故有田至舍法行罷歸買馬龔籐濤司登請復其舊守曰買馬養士孰急登曰買馬固急然

學校禮義由出一日廢衣冠之士與堂下卒何異守曰抗長吏耶登曰天下所恃以治者禮義與法度耳既兩棄之登亦何言守改容從之尋攝獄事有囚殺人守欲減等曰陰德可爲登曰陰德豈可有心爲之殺人而可僥免則被死之寃何由而銷滿秩士民丐留不獲相率餽錢五十萬不告姓名登辭之不可錢無所歸遂請置書藏於學歸至廣會新興大饑帥連南夫謂林師說曰撫凋瘵者莫如高主簿遂檄以往至則發廩賑濟願貸者聽復爲糜於野以食之全活以萬計嗣歲大稔償亦及數將去民投牒願留者數百輩帥漕列奏遂改正任

紹興八年赴政事堂審察遂上疏萬言及時議六篇

其序

曰方今賢才未用有蔽主者焉二府容具位之臣盈庭多罔上之議作蔽主上下二篇財計未足有蠹國者焉大倉給冗食之兵良田膳游手之民作蠹國上下二篇兆庶未寧有害民者焉冗官起貪殘之念募役長戕賊之姦作害民上下二篇帝覽而善之下中書秦檜惡其議已不復

以聞授靜江府古縣合道湖州守汪藻館之月餘謂其

屬曰此公清脩議論極正留與脩徽宗實錄登固辭或

曰是改秩之階登曰但意未欲耳遂行至靜江府廣西

帥沈晦問登何以治縣登條十餘事晦曰此古人之政

今人恐不可行登曰忠信可行蠻貊謂不能行誠不至

耳但登不差人下鄉亦願公不差人下邑晦曰謹奉教

登以廉謹公仁四字自警有所追呼必寬期限訟者悉

從面決吏無所容其欺又新黷宮以來學徒凡賓橫象

宜之士皆羸糧而至胥徒有辭役而就學者縣有豪民

秦琥好持吏短長登至故為迎合倡議遷學登驟喜之

補以學職日以善誘之他日琥乘間請屬登謝卻之琥

怒會有愬其侵貸學錢者登呼至面數琥奮臂厲聲曰

何預君事登叱下白郡及諸司必寘之法琥忿而死一

郡稱快帥胡舜陟謂登曰古縣秦太師父舊治太師生

焉盍祠之登曰檜為相亡狀祠不可立胡怫然曰汝欲

為好人耶方冬又令市熊掌登曰踐雪搏猛獸驅民於

死不可舜陟大怒據秦琥事移荔浦丞康寧以代登民
遮道號泣累日不得前他邑民競丐移登爲其丞簿適
母病申乞尋醫不待報去舜陟遂爲檜父立祠且誣登
以專殺罪詔送靜江府獄檜亦嗾怒奏取旨諸路提刑
根捉舜陟徑遣健卒至漳浦捕登屬登母死舟中聞有
捕命卽藁葬水次航海詣闕上書求納官贖罪以終喪
上覽而憫之送中書行故人有爲右司者謂登曰丞相
云嘗識君於太學能一見終身事且無憂上書徒爾爲
也登曰某但知有君父不知有權臣旣而中書奏故事
無納官贖罪送理寺仍下靜江府獄登號泣而歸葬母

畢詣靜江勘舜陟先以事下獄死矣事白勅還家至廣
漕鄭高趙不棄辟攝歸善令是秋差考試潮州登憤權
臣專恣摘經史中要語命題使諸生論直言不聞之可
畏策閩浙水災之所自時丞相趙鼎在潮謂登曰天下
主文多矣未有如公忠誠愛君者留語終日郡守李廣
文馳以達檜檜聞之益怒令理寺坐以舜陟所奏且奏
云雖屢更赦宥然情重法輕特旨編管容州南省至揭
登名以爲考官戒初登出潮陽試院送歸舊隱與學者
講論忽州遣使臣謝大作持省符示登登讀畢謝卽上
馬大作謂少入告家人無害也登曰君命不敢稽大作

愕然比夜巡檢領百卒復至兵刃森列登曰朝廷若賜死亦當拜勅而後就法大作感登忠義爲泣下奮劍叱巡檢曰省符在我手無他語也汝欲何爲時鬲與不棄亦坐鑊一宮登至容種蔬植竹爲終焉之計家事一不介意唯聞朝廷所行事小失則輦感不樂大失則慟哭隨之容窮陬聞登至執經相從者數百人登爲講明大學中庸之旨教方行而疾作矣以紹興戊辰歲卒於寓舍有巨星如火自寢中飛出向西北去先是三月登得寒疾自作墓銘云耳曠目昏顏凋髮禿有兒歸葬蟠山之麓藏焉息焉以坦吾腹乃召所與遊及諸生訣其子

扶請更醫登曰原始要終故知死生之說吾不起矣復請灼艾登曰身體髮膚不敢毀傷命止此無益也適黃通守勲至曰彥先怕痛乎登曰某嘗獻瞽言刀踞鼎鑊且不顧此何足畏但無益耳因命扶寫帖榜于廳事云奉先人遺訓不受僧道紙籠之類又命斂以深衣幅中大帶語出處行藏及天下大計累數百言不一及其私也病亟黃通守又至曰無所屬乎登以手撫牀曰天下蒼生望霖雨黃肅容起謝勲何足以當此楫黃出屏妻子整衣端坐而逝登少失父事母至孝嘗舟行阻風念無以奉晨羞忽有白魚躍于舟母病思鹿肉夜有虎啣

鹿置其門其學以慎獨為本所著有家論等篇及東溪集若干卷揚汝南陳景肅皆師之後二十年丞相梁克家守何萬傅伯壽相繼以其事聞追復廸功郎胡澹庵銓為作忠辨後五十年朱文公為守作祠堂記復奏乞褒錄贈承務郎成化間縣人吳震請于朝立祠本邑有司春秋行祭

論曰東溪太學生未有祿于朝方當板蕩顛危之秋引身避害誰得而議之乃與同志諸人請隨駕隸諸帥帳下扞主于艱其忠愛惻歎天性然也故能伏闕陳書指斥奸諛不遺餘力傳所云存君興國而欲反

覆之非以氣勝也觀其知寒暑之為患百折不撓蓋死而後已者幸而不死臨歿猶惓念蒼生遺訓家人得正而斃其所養於中者可知矣詩曰惟其有之是以似之朱子守漳為作祠堂記復奏乞褒錄有以也

劉衍 林彥質 陳景肅 植 格 余 嘉

劉衍字成之龍溪人治平二年進士博學勵廉隅初授英州推官呂大防辟衍同孔平仲王祖道三人赴材識茂明科衍言時務諷及新法有司不敢取後以薦知潮陽縣歲大歉發縣帑佐以家貲運廣州米以救之民得不饑元祐元年改新州以禦妖賊功加騎都尉秩滿詣京

師會知杭州趙抃亦秩滿同日引見與安石議青苗不合抗辭折之遂力求致仕乞以所授章服賜其父鄉人榮之年纔三十八累辟不起壽八十餘

林彥質字彬叔漳浦人崇寧五年進士所至州縣俱有廉名時蔡京父子用事朝士出其門者多通顯彥質獨不阿附遂寢中除之命遷兩浙舶使移廣州條舶司以利病陳于朝秩滿乞歸幅巾野服將終身焉所居去城百里捐金募植松栢清陰滿路行者德之

陳景肅字和仲漳浦人今詔安唐將軍元光裔孫也師事高

登有學行嘗同秦梓出使燕趙歸表為祈請使不拜歸

講學於仙人峯下登紹興進士令仙遊多美政尋提舉湖南除知南恩州詔入知制誥以秦檜故不拜出知台湖等州題詠多譏刺檜黨惡之乞歸與門人楊士訓吳大成等講學漸山檜死議均役復知制誥致仕時已八十餘矣適南恩州叛服不常擇使宣慰朝議非景肅不可令持節往嶺南途平卒贈光祿大夫資政殿大學士謚廉獻所著有拈翠集若干卷孫植格

植字寤立幼學於世父安卿年十八以恩蔭補太學生調龍溪令轉漳州司理淳祐四年登進士第初在太學安定郡王趙伯澤妻以女賜食邑專提督嶺南海路兵馬

少帝浮海植提領海舟見事危斷維出港自以六舟泊
梅嶺收亡命馳檄諸蠻圖立宋後聞世傑覆舟元人索
捕急遂變姓名匿于大岸白葉九侯間今詔安地臨終遺命
曰葬我必南望崖山格植之弟也為宋海鹽簿少帝之
亡格從容就死忠義形於六詠植歛其袍笏招靈墓于
漸山書院 國朝雍正元年俱祀忠孝祠

余嘉字若蒙龍溪人淳熙十一年進士授惠濤二州教授
進聖域記特授浙西倉幹復進皇朝職志高宗政範差
監樞密院激賞庫進資時十論伏闕上書論韓侂胄又
上書力沮和議復為古鑑錄以進改通直郎主管嶽祠

嘉性嗜書所著周禮解禹貢攷春秋地例增釋紀年數
雜編五音姓譜又哀前後上書曰代庵集骨鯁集

論曰宋自介甫當國迭逐不附已者厥後蔡氏秦氏
韓氏相繼秉鈞摧折正人排陷善類然士氣愈抑愈
奮開寶之初獎進忠良數傳而至慶歷嘉祐廣開言
路有以封殖滋培而震發之使然也劉衍爭王氏新
法林彥質恥及京卞父子之門陳景肅以秦檜之故
不拜制誥子孫化之視死如歸余嘉上書力沮和議
之數子者皆與東溪後先輝映桑梓為邦司直不當
李如是耶

李亨伯 李 絳 蕭 韓 陳 衡 陳宏規

李亨伯字安止龍溪人治平二年進士授福州懷安尉遷知東莞縣縣有巨盜出沒海島中為邑大害亨伯率軍士乘夜渡三洋潛行七百里抵香山賊藪出不意扼之皆就縛海濱帖然以功遷知梧州興學舍立六賢堂以振士風再遷知全州經理西原諸蠻威名大著終忠州防禦使有任子恩悉推予兄弟之子為文有體尤長於詩其立朝與張商英蘇軾相友善軾子過跋其遺文曰李防禦公以破賊功知名南服還家過羅浮為先君留十日飲過方侍行具見其事不踰年公還朝宰相薦換

右列付方面蓋欲以功名委焉而公踐循退避終老於鄉里此非進退出處在我安能以清節照世乎子大方以文名于時

李絳字伯華龍溪人熙寧六年進士初知貴州秩滿除編修國史出為福州叅議尋知建州歲荒捐已俸糴米以賑濟饑民左翼軍叛其勢洶洶人莫敢前絳獨身出誘諭之軍皆庭拜州賴以安子寧國朝奉大夫光國承議郎安國承奉郎

蕭韓字棠仲龍溪人大觀三年進士調古田尉獲盜三十餘人或教以究賊當應賞格韓曰利因命以取官非吾

志也遂減贓以不及格補次等官而盜得免死調南康
丞再調福清丞有誣告平民妖術者時禁方嚴鞫爲申
雪保全數百家知南恩州道遇蒺藜賊蒺藜賊者言其
劇害可畏也咸頓首曰聞公德政願乞更生鞫下車首
招來之盜患遂息而郡無城郭民又苦海寇不時至爲
築城植刺竹海寇亦引去不敢犯舊未建學雖有長才
秀民一切編丁身役鞫蓋學舍市田置書聚生徒教養
之免秀民丁身役任滿乞祠里居二十六年卒年八十
九

陳衡字秀平乾道八年進士調高要尉以擒海寇獲賞改

知寧都尉時留正爲守薦除福建帥幹遷知廉州陞
奏差役之弊至郡再上章乞祠丞相京鏜曰此恬退士
也除宜州衡力申前請乃得祠慶元初召至京著十論
以禱廟議除知興化軍有攜權貴書求館餼者衡曰吾
不能以官物徇人樽節用度增糴備荒邦人爲之立祠
陳宏規字獻可龍溪人丙戌進士慶元元年以軍器監丞
出知潮州增置韓江東岸作橋名曰濟川以渡人闢養
濟院以處廢疾無告者潮人祀於名宦名爲吏部郎歷
官至朝請大夫

論曰同事異功同功異績夫騏驎之行也一日千里

而駑馬曾不能以一舍言才之不可以已也自亨伯至宏規五人皆能為民禦患濟艱處倉猝顛沛中人皆劫劫彼獨有餘豈非其長材勝耶

楊令問 林積 王梁材 林磐 楊汝南

弟承祖 翁待舉 陳競 趙師楷 黃八京

李恂 李時中 趙彥愷 林孔昭 士蒙

趙善封 姚東 謝明之 趙善叻 趙希佺

趙彥彌 趙希佚

楊令問其先蜀人登淳化三年進士歷職方員外郎爵黎城縣開國男真宗咸平景德間寇侵邊選任防禦使邊

民安堵璽書褒寵者三天聖元年奉詔居于漳遂奉其

父中丞仕休籍於長泰陳塘洋浮山為長泰人弟令緒

官奉禮郎

林積字公濟龍溪人慶歷中循州判官廉勤方正嘗覆按

盜獄多所平反失部使者意因是止不薦積笑曰失一

薦而活五十八人吾何憾焉採廣東志名宦傳

上梁材字廷衿龍溪人元豐八年進士上書陳朝政闕失

乞減省後宮及行幸不急之費上嘉納之除京西運判

遂為夔州轉運使以母老不欲遠去謝表有云就故國

之蒲魚聊供返哺上不允復移利州常平使未幾攝成

都府事乞就養未至家而母卒廬墓三年服闋改提舉
廣南坑冶上慰勉之謂卿屢歷艱難此行事竟當有以
處卿特轉朝散大夫廣東運判專措置坑冶於于官

林磐字定國系出興化美門官于漳因家焉登元豐進士

調汀州教授知青州千乘縣時天旱諸縣蝗獨不入青

邱境歷任知郃武軍丐祠以朝散大夫致仕同里周純

林元曾胥王聘同時典郡遂改所居集賢坊為萬石坊

楊汝南字彥侯龍溪人擢紹興十五年進士郡守李彌遜

奇其材勉就宏詞科中書以其文崛奇不署至是登第

初調贛州教授撰詩春秋中庸要語著經說三十篇以

授學者乃進表于朝祭酒楊椿贊之曰今之師範也即

薦改秩知福州古田縣以廉平公勤自警尤以教化為

先務修學舍置學田與諸生質疑問難疊疊不倦又造

安福橋長六十丈以濟涉者與廬陵楊萬里以節義相

勉尤善高登扁其所居堂曰不欺鄉居講學戶外屢常

滿焉孫承禮承祖以門蔭補官承祖有傳

承祖字慶襲弱冠通百家尤工於詩初調邑郡理曹斷獄

得情再調循州推官於郡政多所裨贊帥雷孝友舉承

祖自代改知安溪縣勞心撫字去之日邑民遮道擁留

及倅循陽父老迎而相語曰是吾前日清嚴推官也攝

守惠陽饋遺一無所受廣憲使王涪首以廉吏薦除知
新州祈雨輒應帥洪伋辟守恩平復改梅州赴闕奏事
陳二廣便宜上嘉納焉年五十卽丐祠歸築別墅有荷
塘十里扁曰歸耕與諸賢爲真率會恬如以終

翁待舉字至德先京兆人徙居漳浦

今詔安

于時方行舍法

惟待舉文字拔出時髦登政和二年進士紹興中知興
化軍不入內寢夜五鼓輒披衣起自以瓦釜煮粥啖之
就燈下讀中庸一遍乃出蒞事或有干以私者曰某一
秉判筆如見神明羅列其旁干者縮舌而退嘗奏蠲本
軍諸色錢漁人所輸稅及浦生之草採者毋出錢興化

人德之祀名宦後知瓊州卒

陳競字戒叔玠之從姪孫宣和間貢辟雍以特科調貴州
法曹當路交薦不受職登紹興庚辰進士初尉長汀再
授恩平新興二州教授留正知贛州辟注龍南令兼僉
幕府事有周禮解及雜文數卷藏于家

趙師楷字清之宗聖榮國公之後世居三山父伯壽任漳
幕因家焉師楷學詩於黃樵登紹興第選授浙漕幹官
有誣屬邑令者漕使欲劾之師楷曰若憑單詞得無冤
乎訪之果誣也改知湘潭以尚書徐應龍薦召對首論
邊防次論幕兵寧宗曰誠當今之急務除提舉左帑改

倅惠陽多異政守撫州慎防鹽盜民賴以安秩滿除廣東市舶革無名和買之需遂爲計度轉運使攝帥事被召首陳正心之說除大府丞未幾除直秘閣知建寧府進秩直寶章閣出帥廣東卒于官

黃京字葉叔龍溪人紹興二年進士初在郡學與高登相友善至是又同舉進士登調桂嶺簿京調連州戶曹並以清白稱秩滿歸里間登以直言斥恬無仕進意時年未四十性樂施予所識闕乏者厚贖之鄉人稱爲長者李恂字鎮言龍溪人性敏好學紹興十五年進士任縣尉以捕盜獲賞改知晉江縣後知邵武軍以宮觀致仕恂

登第時與史浩同甲後浩當軸累召不赴時論高之李時中字守正龍溪人乾道丙戌進士仕宦所至以廉介稱由延平通守入監登門鼓院出知袁州秩滿除廣東倉俸錢不以歸家悉寄之庫

趙彥愷宗室廣陵郡王之後居龍溪淳熙二年進士知臨江軍好賢樂善郡人康庶精於天文彥愷折節事之及卒傾貲以卹其後所居門宇庫隘晚年築小亭於湖上以詩酒自娛鄉貢士許褒光以詩美之云有官千里再分竹無地半畦堪種瓜

林孔昭字潛夫龍溪人淳熙五年進士知永福縣有聲稱

時丞相周必大薦海內士三十五人孔昭與焉除國子
監簿遷監丞有詔令臺諫荐賢良諸公荐孔昭有風力
才望出守處州長子杞以遺澤補官至朝奉郎族子士
蒙字子正其父曰昌篤於教子蒙以周禮三預鄉書登
淳熙庚戌進士初調歸善簿再調梅陽推官廉以律已
嚴以馭吏法禁唯懲狠鬪之民三載如一日民德之改
秩知東莞縣

趙善封字德可善卯之弟居龍溪以濮邸近屬補保義郎
慶元二年進士宰寧德縣課農桑崇學校獎恬退吏以
催科文書呈押輒斥去曰押一花字公家所入幾何民
已不勝其擾矣乃具民戶通數立限揭諸市門曰過限
而不納者國有常憲民感其恩信認八不之邑驚蓋計
戶抑配善封亟罷之民依山而居者以竹楮爲業苦於
需索善封樽節爲之代輸民立祠以祀及守容州尤加
意撫字校產籍以定差役立保伍以戢盜賊廣右帥臣
以善封有風力檄率滕梧等六郡之兵以討賊方就道
賊望風逃散爲政寬平尤尚廉潔大帥楊長孺嘗贈以
詩有清如玉壺冰淡若朱絃瑟之句

姚東字明仲龍溪人慶元二年進士調長溪簿適大旱唯
東密禱卽雨民喜曰主簿雨也令丞廨被火獨簿解存

人以為誠愛所格再調保昌丞臺使者知其廉介屢以疑獄見委囚不敢欺以通直郎致仕

謝明之字惟學承議郎謝伯宜之曾孫登紹熙進士調雷州教授適郡守闕檄明之攝郡次日即發吏卒逐代者緘印以俟守徐應龍至甚敬之與講通家及倅潮陽嘗攝郡三年以廉平稱應龍後位至中書每潮守註闕輒曰不如謝通判尋知邕州秩滿還家以詩酒自娛

趙善昉字文彬宗室昌王之後居龍溪以濮邸近屬賜官登慶元五年進士調連江丞攝邑事修常平倉易以新米又興水利賑貧民調保昌時有劫盜善昉疑其非辜

物色之果得直盜會有他警善昉設伏濬濠賊知有備而退倅潮攝郡捐官田以贍學士潮人德之秩滿以朝散郎致仕

趙希佖字安道宗室舒國公之後開禧五年進士調古田尉獲盜十有七人或謂格當賞佖曰殺人以邀利吾不忍也白之官長止坐其尤仕終沙縣丞希佖所至必崇禮重賢尤尚廉潔

趙彥彌字仲高寶慶二年進士調番禺尉歷翁源令嘉熙四年鄉郡大饑穀斗直錢五百死者相枕籍彥彌惻然捐私廩千餘斛日為一粥以食之不足則糴以繼全活

數千人鄉人德之

趙希侏字佚道希佞之弟少力學不倦與兄同學於黃樵而友於黃學臯嘗以書薦名漕臺試南宮不利改習詩登寶員慶進士調惠之歸善尉爲人謹儉當官廉恪卒于官

論曰周官使民興能入使治之使民興賢出使長之夫才能所以治事而爲民師保父母則愷弟之君子尚矣漢司馬遷有鑒于張湯王溫舒等之武健嚴酷因作循吏傳而後之史氏因之自楊令問迄趙彥彌二十人皆漳之良也以其有愛于民故類列之楊汝南以不欺名其居翁待舉讀中庸一遍乃出治事不知是何以能恫瘝爲心而立斯民之命也乎

蔡元鼎

蔡元鼎漳浦人五季衰亂隱居不仕以文章自娛宋初屢徵不就講學大帽山生徒至者千人所著有中庸大學解語孟講義九經解洪範會元及雜數詩藏於家學者稱蒙齋先生

論曰子朱子作學傳序謂禍亂至五季而極其時干戈搶攘禮樂崩離斯道不絕如綫元鼎獨潛心六經著大學中庸解語孟講義何其擇術之正歟白露零

而蒼葭不改其色風雨晦而鷄鳴不輟其音躡中庸之庭而入其室使後之論世者瞻梁峯之崔巍輒仰止于帽山有開必先道固然歟

陳涪

陳涪字安卿龍溪人居北溪學者故以北溪先生稱之少而識高趣端學務求實以同俗爲恥間取濂洛遺書伏而讀之曰是若與吾心會循牆闔門未身其奧吾心慙焉及聞朱子講道武夷嘆曰是濂洛的派羸糧願從厄一於無資會朱子來守漳州袖所作自慙詩爲贄朱子讀之恨相見晚與語知其用工深久直以上達之理發之

淳聞語深思益求所未至朱子去郡每語人曰南來吾道得一安卿爲喜又曰安卿看得道理儘密此間諸生未有及之者又曰近得安卿書亦甚進異日未可量也涪又積十年之學凡所讀聖賢之書講明義理洞究淵微日用之間行著習察有以洞見乎天理流行之妙胸中洒落隨其所處莫不有從容順適之意不遠千里往質朱子朱子有喟然與點之歎又告之曰當大作下學之功毋專任上達之見當如曾子專事於所貫毋遽求一當如顏子專事於博約毋遽求卓涪歸更無書不讀無理不格旁搜廣覽惟恐或遺嘗語學者曰書乃帝王

大用流行處周禮乃周公大用流行處春秋又孔子大用流行處而朱子所表四書及近思錄乃聖賢傳心明道之要法學者造道成德之大端皆不可不盡心焉蓋妙道在精義須從千條萬事中申過無一不周匝然後爲聖門之實學不然則落空矣于凡經傳子史之所載紀綱法度之詳禮樂刑政之用古今興衰治亂之原得失利害之幾與夫異端邪說似是之非淺深疏密難明之辨無不周詳究勘徹上徹下而於朱子之所以教無復遺恨矣朱子歿涇僻處陬澁曩時同門諸老皆已零落後來者率累於科舉習於見聞惟鄰郡泉蒲間有相

信從者嘉定丁丑以待試寓中都四方友朋皆來叩質朝士大夫爭館迎焉嚴州守鄭公之悵聞其至招致學宮坐臯比講道時有竊似亂真自立門庭者教人默坐求心謂可一蹴而至而以致知格物爲支離認人心爲道心而是非理欲之所在皆置不問後生晚出喜其便簡羣然和之瀉極力排之所以發明正學以求指歸則有道學體統等四篇所以排舐異端中其膏肓則有似道似學二辨旣歸泉人士師事益衆瀉與講解率至夜分惟恐聽者之勞而在已曾無倦色惟慮人無以受之而不憚傾倒所有以告於是門人隨其口授筆之於書

大學論孟中庸則有口義仁義禮智心意性情之類隨事剖析則有字義詳講仙谿陳沂久往來門下輯一時間答之言為筠谷所聞二卷其深切著明者也涇之道至晚益尊行著于鄉德形于言胸中明瑩若太空無雲而其辨說條暢浩乎水涌而山出其推已及人之心甚于饑渴嗜慾不能自遏戊寅授廸功郎主安溪簿泉南諸生竊自幸有以終教將行竟卒時年六十五矣于是相與哀哭曰何後學之不幸壬午以恩贈修職郎學者稱朱門高弟子架能讀父書詮次其家集為五十卷

國朝雍正三年奉

勅從祀孔子廟廷

採道南原委

論曰先儒有言聖人之書遠如天近如地北溪先生以明睿之資為深潛之學讀其遺書窮深極微而出以平易淺顯由其言以久德躋堂皇而探窾奧坦如也其有功于來裔嚴陵講義四篇高矣美矣後之論道學者無以復加矣開吾閩榕邨梁麓之先使清漳之流接源于濂洛洙泗為鄉先覺何媿焉

王

遇

楊士訓

李唐咨

石洪慶

施允壽

秘易簡

朱飛卿

吳大成

蔡逢甲

林宗臣

李

則

蕭

里

穉

竦

吳

澥

黃學阜

陳思謙

林大年

潘

武

趙希濤

王遇字子合一字子正

號東湖

龍溪人父羽儀紹興壬戌進

士官至朝清郎通判衢州有文名遇甫弱冠補太學生
升上舍呂東萊爲博士深器之補以學職乾道壬辰登
進士甲科調臨江教授丁外艱服除改處州教授繼丁
內艱服除改蘄州教授遇閑居不遠千里游於晦庵南
軒東萊三先生之門考德問業以正學不明爲憂其學
務精思力行不爲入耳出口董教蘄陽日與諸生講說
語孟經史夜漏二十刻不休蘄士化之時相欲以掌故
處遇且囑往候遇曰朝廷用人使之知又使之候是自
取辱也不往亟趨部注懷安丞帥詹體仁鄭僑延置幕

府裨贊甚多丞相趙汝愚將擢用而僞學之禍起矣久
之以給事尤袤祭酒李祥薦乃知長樂縣樽節浮費積
錢數千緡興脩大塘水利溉田千餘畝時陳自強林采
權勢薰灼遇不爲屈轉贛州通判韓侂胄聞其名屢欲
邀之不可嘉定初丞相錢公擢爲太學博士未幾除諸
王宮教授毗陵守闕朝議以授遇適歲旱講求荒政竭
官儲以賑民凡公帑餽遺公厨宴犒一切停罷積錢數
萬緡以資糴本捐俸金以資賙卹勸分通商躬省阡陌
無一戶一丁不受其惠太湖港爲世家填塞爲田悉開
濬使復其舊會浙東饑復詔提舉浙東常平入對言浙

東水潦浸淫淮南凶民且嘯聚此何等時而不深思遠慮乎願齋戒以飭躬剛大以進德急聞直言以救闕失樂從公議以扶正道法令之施貴順上下之情貴通斷絕斜封墨勅之原常存視民如傷之念既至官留心賑濟如在毗陵時朝議欲行計竈買鹽之策遇力爭以爲不可謂昔人立場定額非不知竈之可數計顧惜窮民不欲盡其力耳今又計竈或有虧鹽必加刑責雖黥罪日積不可勝加非惟浮鹽難買將與額鹽弁失之設使官鹽充積必有獻言計口以買鹽者是今日之計竈乃他日計口之原也議遂寢除大宗正丞遷右曹郎中嘉

定四年校策殿廬事畢而卒王氏豕世仁厚鄉以長者名其家至遇益厚宗族贍其貧乏資其婚葬朋友匱乏捐賑無靳吉凶喪祭一依古禮斥巫覡佛老之陋其居官隨所至介然自守招之不來減之不動朱晦庵稱其純篤呂東萊與其篤實黃幹狀其行謂學識之精義利之明超然於流俗之中不以一毫私意累其心云所著有論孟講義及兩漢博議藏于家

楊士訓字尹叔漳浦人

今詔安

父成大鄉貢士早世事母至

孝廬墓三年哀毀慘切鬚髮爲白士訓性醇靜警敏自刻益勵常從學於陳景肅及朱文公守漳置賓賢齋擇

海州府志 卷之二十一
士之志學者處之士訓年最少預焉稱其學已知方郎
中王遇見而異之妻以女所居號盤庵學者不遠數百
里從之慶元二年擢進士調古田尉再調海陽丞政尚
寬和訟者以禮義曉譬多釋爭而去後遷永福令永福
俗險健士訓推誠以待之留意學校更定祭器脩立壇
壝人士多頌其德諸臺亦以慈祥豈弟聽訟平允薦之
會湖廣總領請于朝願得廉靖吏以董軍餉遂差鄂州
糧料院荆襄兩路軍儲皆屬焉未踰月卒于官平生好
賙人急而自奉甚約囊橐蕭然卒之日無以爲檢總帥
率所屬周旋其喪以歸葬于官陂之南勉齋黃幹爲銘

從弟士謹登嘉定第任博羅尉與士訓同稱賢云

李唐咨字堯卿龍溪人與州學士石洪慶林易簡施允壽
皆以鄉評推重一時朱文公守郡日延於學爲諸生楷
式公牒云李唐咨林易簡或究索淵微或持循雅飭察
其言行久益可觀施允壽石洪慶皆以耆艾之年進學
不倦強毅方正衆所嚴憚四子學行卽此牒可考矣
朱飛卿受業於朱子自言窮理而事物紛紜未能灑落處
惟見得富貴果不可求貧賤果不可逃耳

吳大成字子集漳浦人

今詔安

聞陳景肅師事高登學有淵
源往受業焉嘗遊太學論舊相張浚清忠與秦檜忤及

汀州府志 卷之二十一
廷對語多侵時宰檜益惡之落第自以終不能爲貴屈
遂歸隱檜卒乾道中奉檄湖湘往還江浙仍不得志歸
曰樂在是矣自是僑居梅洲課子讀書景肅卒爲作塋
域心喪三年時趙師縉陳汝卿來會葬因過小洲梅竹
蒼翠蔬菓行列門庭修整長幼齊邀各贈以詩寶慶三
年卒著有梅花月詩集又有筆義經疑傳藏于家

蔡逢甲字國賢漳浦人常受業陳安卿之門與安卿辨論
河洛同異及太極圖西銘之相發明處安卿稱其有特
見登咸淳進士詔主廣東漕舉值宋亡不肯仕自號棄
夫作悟道書院于玳瑁山下鍵戶不出臨沒自題其墓

曰前宋進士蔡逢甲墓著有講錄

林宗臣字實夫龍溪人高東溪門人以儒業登科官主簿
與汪叅政澈友善汪在省中宗臣貽書罷本州鬻鹽州
人德之素有藻鑑見陳北溪趣向不凡大稱之謂曰子
所習科舉之文耳聖賢大業則不在是乃以朱文公所
編近思錄授之

李則字康成龍溪人紹興十二年特奏名少孤力學初試
大學不偶浩然東歸教授生徒至百餘人如楊汝南李
恂輩皆爲名士累薦鄉書授桂嶺主簿攝富川令調泉
州德化令皆有政聲則之學兼得於蘓程二家其教人

惟以仁義為宗不愧古之鄉先生云

蕭里字元舉龍溪人力學好古以周禮名家有經解受業者多為聞人登慶元第調同安尉一介不取再調廣州教授卒盤庵楊士訓為墓銘其辭曰嗜學如饑赴義如慾

蘇竦字廷儀龍溪人今海天資好學凡所未見書必借閱手抄不輟博通經史玩心理學登慶元五年進士授肇慶府推幕有廉介聲政務之暇集先儒詩易二禮傳折衷以已見從游子弟率數日人

吳澥字清臣龍溪人兩請鄉舉有聲學者師之號省齋先

生著述甚富援筆立成皆極精妙與陳知柔林光朝諸

公為莫逆交知柔嘗擊節稱賞謂其貌古心古學古文

古使其閉門著書當不在楊子雲下有省齋集行于世

黃學臯字習之龍溪人父拱紹熙中以禮記兩薦于鄉學

臯博通經史尤長于詩書春秋文公守漳學臯與朱聞

禮俱以稚年輪講慶元間預鄉薦入試南宮策問三舍

法弊學臯謂當如程伊川改試為課及制尊賢堂待賓

齋與時論不合有司曰此必偽學也黜之嘉定十六年

始登第仕番禺簿趙帥師楷每事必資之尤為丞相崔

菊坡料院虞衡所器重再轉為邵陽丞待制李性傳延

入郡齋校勘朱文公續語錄因薦之調泉州察推需次于家郡守方來屈居學職哀論孟義利數章辨折界限以誦諸生溫陵劉克遜以廉吏科薦之年七十餘丐祠歸手不釋卷所著有評古一冊補註東坡詩一部疾革凝坐而逝

陳思謙字退之龍溪人學問該博教授後學著春秋三傳會同及列國類編朱文公喜之以語其門人李唐咨以女妻之

林大年字壽卿龍溪人試太學屢占前列累分數幾及格輒止拂袖歸養年八十二以書義再預鄉書郡延爲州學正年九十餘耳目聰明行不以杖暇日與生徒討論未見之書終老于湖山年九十六卒

潘武字叔允龍溪人嘉定庚辰特奏名履行端方於書無所不讀與陳北溪爲道義交鄉子弟多執經從游進士趙希流吳仲倫皆出其門

趙希濤字清甫宗室楚國公之後父師介通經術雅有大志教子力學希濤少以詞賦名兼通周禮後以周禮薦胄監入宗庠屢以經義詞賦占前列由舍試上舍皆入優等紹定己丑廷對乙科調容州教授卒于官

論曰古所謂儒以其通于天地人之理也至如近文

章博學多聞澡身浴德謂不升聖賢之堂而嚙其馘可乎王東湖學識之精義利之明見稱于黃勉齋楊士訓醇靜敏警餘五人皆與聞考亭之教其學卓矣蔡逢甲以下聚徒講學固窮不渝視漢儒章句之學拘囿於語言文字者高出一等律以哀公所問與夫子所稱何多讓焉

蔡瑗 陳伯温 吳桓 吳與 劉棠

鄭公顯公敏 余詔 蔡如松 林師德 宋聞禮

陳經

蔡瑗字希遠龍溪人皇祐六年進士官至朝請大夫歷典

五郡徽宗登極上封事言商三宗嚴畏周文王無逸為

萬世龜鑒上嘉納其言除江淮荆浙福建廣南等路都

大提點坑冶瑗以文章政事名世而聲律尤長所著有

鵝城集及今古名賢警句行世

陳伯温龍溪人元豐間以詞賦稱伯温賦仁者靜為監元

同邑王補字肩甫詞賦與伯温並稱不就特科時稱伯

温肩甫賦中之虎

吳桓字孟文龍溪人元豐八年進士熙寧間陳三叟三術

指切時務官至朝散郎攻古文詞人爭慕之有文稿及

古律詩百篇傳于世子南公嘗進中興北廷錄二十事

詔與特恩授戈陽尉不就

吳與字可權漳浦人徙居龍溪元豐五年進士初為四會令改餘干嘗論事侃侃不阿臺使者燕若蒙厲聲曰而欲效漢唐令耶與曰固願學之恨不至耳燕為改容遷奉議郎通判潮州時故人張天覺當國或諷之使見與曰平生與天覺語皆忠義今反欲逞身求進耶卒不往歷官凡七任悉以俸餘收書分經史子至於星歷醫卜之書各以創類餘二萬卷鄭夾漈稱海內藏書者四家而首漳吳氏有文集荔支總錄新記錄藏于家

鄭光顯字隱之龍溪人初以周禮舉鄉貢又以詞賦預薦

登乾道丙戌第調富沙戶曹秩滿獻時事十論于朝授潮州教官改宣教郎宰同安縣有惠政除監進奏院遷宗正簿時災異數見應詔進三說謂指陳大政而毋據細故直書事實而無尚繁文此其二在大臣其辭簡其事核然後得以親覽而審擇之此其一在陛下除大府寺丞兼勅令所刪定官進權刑部郎官兼權直學士院遇慶會聖節有旨過官稱壽宰臣率百僚拜表就公顯索作援筆立成詞甚工求外除補浙西湖南倉使再入為右司郎中俄兼左司歷官至中奉大夫龍溪縣開國男有旨與祠公顯學有淵源為文切當有法度尤長於

儷語廟堂表制多出其手有文集十卷時事論十篇及語錄傳于世第公敏字明之幼孤與兄公顯苦學時號二鄭登乾道己丑科調福清簿有政聲以薦調古田教官廣學宮新祭器建講道堂闢射圃日與諸生講學發明大學中庸之旨時論翕然當道相繼薦之改秩銓曹以名聞會疾作卒有著述五卷

余詔字道夫龍溪人有學術隱東湖號東湖居士以詩文自娛著有栖靜堂集

蔡如松字勁節龍溪人慷慨有大志讀書於岐山仙亭巖與顏師魯友善同預鄉薦時吳獬以能文鳴如松與之

辨論不為屈乾道間特奏名調東筦簿歷四會令新興推官晚節不樂仕以祠祿乞歸著漳南十辨及歌詩記

文等作按一統志載蔡如松於名宦謂如松知漳州種道傍松但查通志及前志歷官俱無此人恐誤林師德字叔正龍溪人紹興元年特奏名任廣州東筦尉

獲盜功改承奉郎武岡軍僉判師德在鄉里為學者師遊太學與黃樞齊名尤長於駢儷名位不顯士論惜之

宋聞禮字叔履嘉泰三年進士授叙化二州教授歷知海陽縣有易禮記詩解行于世

陳經字叔綸龍溪人今海澄弱冠登淳熙進士調廣州司理辟新興令改福清首以教化為務倅循州知欽州封州

嘗學文於曾樽齋雅得其妙尤工於詩時郡守趙汝鐙
教授敖陶孫皆推服之自封州秩滿歸恬於仕進以文
字爲樂與傅伯成孫昭先爲三老真率會有德齋文集
論曰文所以載道也綠衣三百色如之何紵衣三千
寒如之何乃自漢氏以來枕藉經史適相祖述由未
而推其本蓋六藝之支流餘裔也容可廢乎自蔡瑗
已下凡十二人所造不一各自騁於著作之林振藻
海濱不謂之一時之雋不可矣

黃 概 薛半千 陳 諤 陳 玠

黃槩字平叔龍溪人好學力行事親至孝嘗語人曰學者
學爲忠孝而已不爾雖讀書與不識字同父有疾傾貲
求醫或謂槩家貧獨不爲子孫計乎槩曰苟吾父可愈
子孫雖饑餓何傷父將卒勞之曰爲人子若爾者可無
憾矣以子彥臣貴封承議郎賜緋累贈朝散郎子孫登
科不絕

薛半千字子中漳浦人兄弟三人皆孝友母病半千嘗藥
視食衣不解帶久之母病轉劇半千計無所之祈天割
股和羹以進其伯兄鐫心血以調藥仲兄復焚香于頂
以求福母病果愈縣令林稽道聞之爲立孝義坊以旌
其門

陳諤字昌國龍溪人有至性少游太學累試不效歸以其學教授里人以孝弟忠信為本兄弟友愛不分居巖宗崇寧初郡舉八行諤為首授岳州文學

陳玠字大寶龍溪人今海澄元豐二年進士初調建之法曹

椽知南建州沙縣監泉州市舶司遷承議郎家豪於財父鍾愛二弟玠能體父意有貲十餘萬輒推與之

前志論日記云傷哉貧也苟能如薛與黃之竭力以事父母亦何貧富之分乎或疑割股椎心以傷親遭體而濱于死非禮之經然生今之世慮其用情之不及者有矣無患其過也二陳能友玠復推財善承親

志矣

謝伯宜 丁知幾 陳耆公 陳湜 陳昌祖

謝伯宜字瞻聖龍溪人今海澄熙寧六年進士初知湖州長

興縣有惠政開水利墾不入境臺使者以其事奏于朝遷奉議郎賜緋官至尚書都官郎議讞平反為多秩滿

家居因疏通九十九坑之水為圩田由是八九都傍海之地皆成沃土今相傳云謝都官築海成田陳太保名香九都人眾以

為都人衣食之原專祠祀之封州守陳經為之紀

丁知幾字潛仲龍溪人唐承事郎丁儒之裔父孝功伯兄知微慶元己未知幾以特奏名進士授潮陽縣主簿有

政聲丁內艱歸先是縣江東南行里許曰文甲官塚下至石美舊以海濱鹹鹵不可田知幾告伯兄曰海濱廣斥如規地捨田爲港通柳營江淡水灌溉之則厥田上上矣知微然之遂于淳熙二年同鄉人陳太柔赴提舉司陳水利狀事下郡邑自捐貲開港一道濶十有八尺深十六尺縈紆三百餘里港左右各鑿渠數十爲斗門三首一以瀉洪潦二以納谿水刻石以識之每于農暇官爲督脩有鐵尺存庫爲深廣之規著令甲故號曰官港數百年二都咸資其利洪武乙亥知府王仲謙勸民重脩萬歷丁亥知縣沈昌期追念興利之功請入鄉賢

祠知微字顯道乾道戊子解元終養父母著書授徒以孝旌知幾長子莘甫次子樵甫孫自得俱以文學授官丞貳曾孫惠開砌石橋石井以利人知微曾孫上舍名英開亦捨田開港周廻灌溉耕者利之稱爲丁上舍港

云

陳耆公長泰人好義樂施與邑有里二曰人和曰彰信水利未通耆公乃捐已田二百四十餘畝易他田開鑿陂塘三十六處水圳三百餘道上起旌孝里下至人和里隨處設堰置閘以時開閉旱有所備潦有所洩歲選有才幹者充陂長糾工修築凡灌田萬有餘畝立石記績

秦人祀之於鄉

陳湜龍溪人政和間嘗有媪遺珠於其門莫記其所久之媪過其門四顧若有所物色然湜呼問之媪泣曰猶記遺珠於是今無之主人逼取雖市屋鬻女度不能償湜曰第言其狀媪以實告湜歸之媪驚喜呼為父拜謝而去里人治喪遺其白金器皿湜拾得之亟問掌事者器皿有遺否掌事人方倉皇求之未得湜即歸之鄉人頌嘆不已湜嘗夢人告之曰汝壽七十二後年至八十四乃終

陳昌祖字世長龍溪人少方學樂于周急淳熙甲午年郡

大饑昌祖於城四門日為糜粥以食饑人全活甚眾

前志論曰宋熙寧間遣使察農田水利令州縣興復

湮廢陂塘而漳謝都官陳太保築海成田變烏鹵為

膏腴遂開一郡水利之祖仁人之澤溥矣顧舊志獨

傳都官何耶知幾之堰水開渠子孫能世其績陳湜

還金昌祖賑饑義行其不沒乎

鄭 栲 顏光袞 蔡 青 胡志夫 蔡君澤

蔡振光

鄭栲龍溪人

今海澄

政和初應選補武學生時募良家子從

軍栲往投鄜延路總管劉延慶軍赴大理河與西夏戰

多斬獲補承信郎賊平授汀州黃土寨巡檢捕獲王猪
 奴賊轉承節郎黃土寨兵黃勝等叛復以柙權巡檢勝
 素懾威名閉寨自焚宣和七年金人入邊柙赴樞密院
 自陳乞發赴河北軍前後累立戰功轉至脩武郎時召
 河北兵馬入京守禦靖康元年金逼都城補為四門都
 巡檢領兵救援力戰死之紹興初劉光世請於朝授其
 子綸承信郎

顏光衮字鼎卿龍溪人

今海澄

以父澤補官調循州興寧縣

令紹定間克賊陳三鎗逼興寧境公衮出縣諭以義理
 賊怒公衮勵聲叱罵之遂遇害興寧民哭之哀為立祠

朝廷嘉其節贈員外郎

蔡青漳浦人紹興間山寇竊發焚逼縣治邑人皇皇莫敢

出鬪者郡使步兵來救青與邑人鄒進熊保俱為左翼
 軍屯于縣北門賊徒三千餘人突至西關青奮勇為諸
 士先號于衆曰吾屬當為國死遂與賊遇三人皆死戰
 自卯至酉殺傷甚衆賊乃分兩道而遁三人乘勝逼逐
 後無援賊反鬪皆死焉邑人哀之為合葬于邑西門之
 外俗相傳曰勇士墓

胡志夫員外騰之孫嘉定十七年辟受承節郎江東安撫
 使司將領史金不屈死諡忠惠

蔡君澤長泰人確之四世孫也性資慷慨遇事敢為咸淳間有賊由鷓鴣突攻瀛山邑人惶惶欲逃竄君澤慮賊逼城乃倡義糾集鄉人保石高寨以遏其勢賊攻寨澤禮于神夜昏曖莫辨時若有火光雷炮聲者澤率眾隨之擊賊賊驚駭敗走城賴以全事聞于朝授武德將軍泉州治中

蔡振先字德揚宋末應薦鳳州總管將之任途遇元兵為所執說之降不可臨之以刃不屈遂被殺

前志論曰鄭脩武與蔡青君澤輩執干戈以衛社稷死不死皆奇男子也志夫受命以出有死無二鼎卿

德揚皆見危致命均之舍生取義者死一也而有死節死事之分死節者以義死者也死事者其勢不能不死而一死以塞責者也若三子者其庶幾以義死者歟

鄭柔 薛京 楊耿 黃子信 楊上珂
沈子真 王德裕

鄭柔字克剛詔安人紹興中在太學與時相秦檜湯思退左嘗建議乞決意北征為湯思退所阻調高要簿不就歸隱九侯山所著有康正題詠時甚重之

薛京字宗沐詔安人與鄭柔俱師事陳景肅肅與秦檜忤

辭知台州京亦乞歸省檜以其爲景肅黨卹之歸與吳
鄭諸楊講學漸山九侯間賦詩自樂終檜之世屏跡不
仕

楊耿字國光詔安人紹興中在太學與吳大成鄭柔薛京
齊名秦檜柄國耿等相率乞歸從陳景肅講學漸山石
屏書院闢精一堂於脩竹里講明經術從子士訓士謙
皆從之所著詩多寓言而忠愛之意宛然如見

黃子信長泰人應嘉定四年特科第二人以文章行誼爲
學者師初調新會鹽場帥楊長孺以其老榜爲監心曷
之嘗摺據其簿書子信去以詩云六年兩度拜宸旒換

得青衫白上頭飛鵲只因無樹遶窮猿何暇擇林投
知着脚當來誤幾欲抽身不自由安得有錢了官債便
無三徑也歸休遂拂衣而去及歸又詩云笑倩西風拂舊
埃歸時行李似初來也知三載清貧好博得一家強健回
楊珂長泰人豪逸不羈吟咏自娛常詠明月詩以見志詩
云明月欺人醉不知夜深偷入詩書帷好將松戶牢關
鎖留取清光莫放歸以林泉終其身

沈子直字景實詔安人博極群書沉重簡默居父喪哀毀
骨立登咸淳四年省元授揭陽縣丞見元兵壓境上疏
乞鳩屯立督以禦敵卧薪嘗膽以勵志布令陳過以固

漢州府志 卷之二十一
衆專任忠義以激厲將士黜遠奸佞以收拾人心當國者忌之子真憤嘆曰天心已違人事復廢國勢不可爲矣卽棄官隱九侯山及宋亡但書甲子不用元年號人比之陶靖節云所著有四書講義表忠錄藏脩錄等書國朝雍正元年祀忠義祠

士德裕字國明長泰人幼有志操聰明強記充邑弟子員宋亡元頒詔至漳德裕拜哭于庭列衣巾焚之曰吾宋人也不復着此矣至正間詔選儒吏延佑初勅省臣訪求遺逸復徵耆儒俱不就隱居教授生徒爲學者所宗前志論曰鄭楊薛當秦相柄國之初沈王際宋祚顛

覆之日潔身不浼遯逃全志其亦有可哀者黃子信以不屈帥長陳揚二子詞賦自樂其隱不同要皆清脩自好不污名利者也頑廉懦立幾矣

○元列傳

林廣發 黃元淵 周佑 楊稷 王吉材

林廣發字明卿龍溪人善古文工詩以部使者薦授安溪學職普寇作奉府檄招降以功授其縣主簿每俘至委訊輒曰此平民也府帥問何以辨曰獲於巢穴者爲賊捕于井里者爲民此俘皆自井里得之何謂賊自是俘至多免死福建分省請置汀漳屯田萬戶府以廣發爲

其府經歷未久卒所著有三溪集傳于世三溪者宋高東溪登陳北溪瀄蔡南溪汝作也汝作號南溪居石碼蔡港作觀瀾書院於平林與諸生講學人稱為南溪先生名亞于高氏陳氏廣發皆向慕之故云

黃元淵字君翌其先南靖人入元徙居龍溪試科目不售遂為隱計至正中憲臣楊不華薦署漳州路學錄秩滿陞泉州路學正而卒先是宋紹熙初朱文公居漳欲於臨漳臺作書室未果後守危種乃成公志作龍江書院以聚學徒嗣守方來乃於書院左作祠以祀文公入元其地為浮屠氏所據元淵乃謀諸郡博士馮灝翁龍溪

教諭郭元發使言之郡台出私錢別買城東北隅地重建之泰定四年初作大成殿祀先聖先賢次作祠堂祀文公以黃幹陳淳配別作講堂齋舍以處師弟子天歷四年告成而家以貧後行省上其事以龍江書院舊額

列為學宮

詳見學士虞集記

周佑字于一龍溪人初治舉子業會科舉中輟乃致力古文詞雄深雅健閩海僉事有左姓者督師漳南佑撮取邊事顛末題曰邊臣近鑑以獻左讀之曰史才也薦為同安文學進其書于朝以備國史編錄由是館閣諸老皆知佑名至正七年與門生林弼同舉省闈及試春官

佑不利歸未幾卒弼為撰墓誌云質淳學正平居言不出口而其中所藏浩無涯際有疑質之斷以一言而盡從遊之徒千里來集壯年有志功業而竟齋以沒悲夫楊稷字宗璉長泰人資性高邁好古慕學隱居不仕至正間邑庠缺官令林幹兒聘攝學事振文風變習尚以義理行誼為教士習一新所著有田家樂歌傳于世歌云田家樂今田家樂樂在堯天事耕鑿大兒北隴種白雲小兒南澗飲黃犢婦姑談笑誅蠶桑深夜寒機響茅屋衣食餘饒稅早輸吏不到門犬睡足有時客至問起居啄黍雞肥新釀熟三杯酒後更高歌盡是田家太平曲王吉才龍溪人篤志古訓尤明典禮郡守知其有身心之學延為弟子師後為泉州路學正天性誠孝居喪盡禮

至耄年哀慕痛毀如初喪平居家庭亦衣冠歛容未嘗見其疾言怒色學者稱為益齋先生

論曰林廣發父子蓋聞東溪北溪之風而起者歟責元淵私淑朱子周伯楊稷王吉才皆好古篤學元去宋未遠鄉先生遺烈猶有存焉者淵源所漸學有家法以是嘆考亭之教思無窮矣

胡景清 王應初 施合德 林原佐 蔡 瀄
黃 榮 蕭景懋 陳元善 陳君用 均 壽

胡景清龍溪人宋胡騰六世孫也元兵下漳南時景清甫五歲隨父母逃難倉卒失其母及長知學每念母輒流

涕一日辭其父抵幽薊尋焉忽於燕市遇其從叔王巨川知母會至燕而未知其處踰年始得之蓋母子不相見者四十餘年矣事聞詔旌表之仍給驛以歸

王應初長泰人從父義士樵劉嶺上有虎出叢棘中搏義士傷其右臂應初赴救抽鎌刺虎鼻殺之義士得生詔旌其門

施合德長泰人父真祐嘗出耘苗虎攫于田合德與從弟發持斧奮前格虎父得生詔旌其門

林原佐龍溪文山人至正二十八年海寇薛均祥犯境鄉人築砦于文山爲自全計官軍圍砦疑皆均祥黨欲盡

誅之原任避難郡城自備牛酒冒白刃往見主帥曰文山之人素守禮義築砦以防寇耳彼何罪帥感其言解圍去砦中數千人賴以全

黃榮字惟達預七世孫鈞貫兵書至正間番寇李志甫攻城榮糾義勇平之省臣上其功授神仙懷安大使秩滿致政歸賊復作榮率鄉人立柵以自保賊不敢犯界省臣策其功終不就

蕭景懋龍溪隔州人故儒者性剛直居家孝友至元四年南勝縣民李志甫作亂掠龍溪景懋與兄佑集鄉兵拒之據觀音山險橋卽今新港橋與賊戰敗罵賊不屈賊怒縛

景懋於樹鬻其肉景懋益憤賊遂以刀決其口至耳傍罵不絕聲而死事聞朝廷褒之仍給錢以葬

陳元善字長卿龍溪人宋進士森之孫也自北溪蓬州遷於馬岐白石能以詩書濟其世禮訓肅其家誠信孚其鄉至正二十七年海墘逃兵作亂兇渠薛均祥執元善并其妻孥欲脅降之以為民望元善不從罵曰吾所畏者天不畏者死汝賊豈能久生耶賊怒殺之妻郭氏子光遠邦達光迪皆不屈而死明嘉靖五年知縣黎良請于御史景仲光立祠以祀

邦達檢家譜補入

陳君用字玉諫景肅裔孫至元中劇寇李志甫黃二使等

作亂守將與戰俱不利君用率從子進卿等設伏烏泥洞殺志甫擒黃二使以功授本路總管同知後北洋海賊入境君用募弓手乘潮進戰擒賊將楊奴等追降其餘黨又破汀賊羅天麟鄧師公於白花嶺及潮寇夏山虎倡亂迫汀漳聞君用師來望風降附朝議以君用屢建大功勅開屯南詔守汀漳正萬戶宣武將軍進階南勝伯卒謚忠潔愍侯祀于鄉孫均壽

均壽幼通經氣宇凜然有古名將風至正丙午父海生丁祖喪詔均壽權父萬戶職無何陳有定叛圍漳州右丞羅良以均壽年少有勇略授副將先是百戶盧積失律

羅良以法誅之復用其子善徵置幕下善徵忽對陰與有定約潛開北門引有定兵入城中至塔口街羅良接戰而死均壽指天歎曰右丞旣死吾安得獨生奮力死戰至赤嶺被執有定愛其勇親釋其縛勸之降均壽曰敗軍之將有死無二有定曰義士也舍之均壽悒悒退隱南靖磴山之陽絕口不言前事人莫知其爲元評事云

論曰野史載孤兒訪親孱子救父不一其人讀之者未嘗不爲之拚書而涕也胡景清王應初施合德彼豈有意後世之名乎屢書不一書以爲世勸也林元

佐蹈白刃救人黃榮爲鄉干城薰景懋陳元善臨危無苟免均壽祖孫俱以雄畧報主處患難行乎忠難亦有幸不幸存焉夫道豈一端而已乎

補傳

○宋

吳明濟明潤明澤詔安人同產兄弟也世業農宋末元兵追少帝過其里適登場納稼三人者率族衆禦之力戰死首俱落矣猶昂然挺身操械長驅至河干而仆翼日帝聞賜祭追封有加族人共立子嗣之

○元

沈詞宗

同生

蘓寶 顏應祐

沈詞宗字朝光一字南月詔安人省元子真曾孫也有至性弱冠隨父朝奉郎福璋出征山寇朝夕定省不離側以孝聞至順間屢徵不起惟竭力孝養以膝下承歡為樂父既沒兄以戶長調充軍衛辭弗獲命詞宗念其艱嗣請代臨行囑妻曰此行歸期未定吾兄若得男子當共鞠育否則以次子繼不數年竟卒衛所長子同生字烏林陳君用甥也嘗佐君用破賊有功授司馬叅軍鎮西林除暴安良卓有成績一方賴之

採家譜

蘓寶字一之居漳為大族初以武功授秦寧尉閩帥忽公

聞其賢辟為職官令史滿秩遷連江寧善鄉巡檢歷福建帥府都事時紅巾盜起寶贊謀有術汀寇不敢犯境泉盜侵長泰寶討逆撫貳悉歸正為王民至正十六年正月盜猝至殺寶及其弟漳浦縣尹和子長泰縣尹信幼子同生伯顏福生孫凱山普安惟一子德生鞠于外家得全寶始受業釣磯邱先生知有身心之學見於施為勤守古則為人中敏而外寬多慧而少文祀先豐備與人久敬雖僕隸咸得其欲遇害時年四十七其妹之夫錢塘馮善與門士陳君玉鄭元圭具棺斂之林弼為

誌其墓

採登州集

顏應祐龍溪人母許氏先以患難遷徙失所之母子不相聞者二十六年應祐訪求不得嘗悲號流涕一日得書知在滇南卽往求果得母遠迎以歸

按宋元去今五百餘載代遠年湮茲特加詳核就可據者採而錄之以補前志之缺

漳州府志卷之三十八終

